





佩文齋廣羣芳譜卷第九十六

佩文齋廣羣芳譜卷第九十七

藥譜

大黃

**增**本草綱目大黃一名黃良一名將軍一名火參一名

膚如陶弘景曰大黃其色也將吳普曰生蜀郡北郡或

隴西二月卷生黃赤其葉四面相當莖高三尺許三月

花黃五月實黑八月采根根有黃汁蘇恭曰葉子莖並

似羊躑但莖高六七尺而脆味酸堪生啖葉麤長而厚

根紅者亦似宿羊躑大者如盃長二尺出宕州涼州西

羌蜀地者皆佳幽并以北者漸細氣力不及蜀中者蘇

頌曰今蜀州河東陝西州郡皆有之以蜀川錦文者佳



其次秦隴來者謂之土番大黃正月內生青葉似蓖麻  
大者如扇根如芋大者如盃細根如牛蒡小者亦如芋  
四月開黃花亦有青紅似蕎麥花者莖青紫色形如竹  
二八月采根去黑皮切作橫片火乾蜀大黃乃作紫片  
如牛舌形謂之牛舌大黃二者功用相等江淮出者曰  
土大黃二月開花結細實李時珍曰宋祁益部方物略  
記云大黃蜀大山中多有之藥市所見大者治之爲枕  
紫地錦文今人以莊浪出者爲最莊浪卽古涇原隴西  
地也氣味苦寒無毒下瘀血破癥瘕積聚留飲宿食蕩  
滌腸胃推陳致新通利水穀調中化食安和五臟宣通  
一切氣

**集藻贊增**宋宋祁大黃贊葉大莖赤根若巨皿治疾則

多方家所銘

**七言絕句增**宋范成大大黃花大芋高荷半畝陰玉英

危綴碧瑤簪誰知一葉蓮花面中有將軍劒戟心

**別錄增**炮炙論凡使細切以文如水旋斑緊重者剉片

蒸之從已至未曬乾又灑臘水蒸之從未至亥如此凡

七次曬乾却灑淡蜜水再蒸一伏時其大黃必如烏膏

樣乃曬乾用

千古商陸

**原商陸一名蕤蕤**音逐一名馬尾一名當陸爾雅云蕤蕤馬尾注

云廣雅曰馬尾商陸本草云別名蕤今關西亦呼爲蕤江東爲當陸一名章柳本草綱目云商陸北

黃書考譜 大黃 商陸







**增**本草綱目防葵一名房苑一名黎蓋一名利茹吳普本草  
又名爵離方蓋農果蘇恭曰根葉似葵花子根香味似防風故名防葵蘇頌曰出襄陽地  
其葉似葵每莖三葉一本十數莖中發一榦其端開花  
如蔥花景天輩而色白六月開花即結實根似防風香  
味亦如之依時采者乃沉水今乃用枯朽狼毒當之極  
謬氣味辛寒無毒治疔瘰腸洩膀胱熱結欬逆濕瘡癩  
癩驚邪狂走鬼瘧百邪

狼牙

**增**本草綱目狼牙一名牙子一名狼齒一名狼子一名  
犬牙一名抱牙一名支蘭陶弘景曰其牙似獸齒牙故有諸名韓保昇  
曰所在有之苗似蛇苒而厚大深綠色根黑若獸之牙

三月八月采根日乾氣味苦寒有毒治邪氣熱氣疥癩  
惡瘍瘡痔去白蟲

藺茹

**增**本草綱目藺茹一名離婁一名掘据藺茹本作蘆藜其根牽引之貌

掘据當作拮据拮据手口共作之狀也蘇頌曰河陽淄齊州皆有之二月

生苗葉似大戟而花黃色根如蘿蔔皮赤黃肉白斷時  
汁出凝黑如漆三月開淺紅花亦淡黃色不著子又一  
種草藺茹色白李時珍曰范子計然云蘆茹出武都黃  
色者善草藺茹出建康白色今亦處處有之生山原中  
春初生苗高二三尺根長大如蘿蔔蔓菁狀或有岐出  
者皮黃赤肉白色破之有黃漿汁莖葉如大戟而葉長



微潤不甚尖折之有白汁抱莖有短葉相對團而出尖  
葉中出莖莖中分二三小枝二三月開細紫花結實如  
豆大一顆三粒相合生青熟黑中有白仁如續隨子狀  
氣味辛寒有小毒治蝕惡肉敗瘡死肌殺疥蟲排膿惡  
血除大風熱氣善忘不寐破癥瘕除息肉

大戟

**增爾雅** 蕎 卽 鉅 注 今藥草大戟也 **本草綱目** 大戟一

名下馬仙 其根辛苦戟人咽喉故名大戟今蘇頌曰近  
俚人呼爲下馬仙言利人甚速也

道多有之春生紅芽漸長叢高一尺以來葉似初生楊  
柳小團三月四月開黃紫花團圓似杏花又似蕪荑根  
似細苦參秋冬采根陰乾淮甸出者莖圓高三四尺葉

黃莖至心亦如百合苗江南生者葉似芍藥李時珍曰  
大戟生平澤甚多直莖高二三尺中空折之有白漿葉  
長狹如柳葉而不團其梢葉密攢而上杭州紫大戟爲  
上江南土大戟次之北方綿大戟色白其根皮柔韌如  
綿甚峻利能傷人弱者服之或至吐血氣味苦寒有小  
毒治蠱毒十二水腹滿急痛積聚中風皮膚疼痛吐逆  
瀉毒藥泄天行黃病溫瘧破癥結下惡血治隱癬

澤漆

**增** 本草綱目 澤漆一名漆莖一名貓兒眼睛草一名綠

葉綠花草一名五鳳草考土宿本草及寶藏論云江湖  
原澤平陸多有之春生苗一科分枝成叢柔莖如馬齒



瓜羣芳譜 藥譜五  
莧綠葉如苜蓿葉葉圓而黃綠頗似貓睛故名貓兒眼  
莖頭凡五葉中分中抽小莖五枝每枝開細花青綠色  
復有小葉承之齊整如一故又名五鳳草綠葉綠花草  
搯莖有白汁黏人其根白色有硬骨或以此爲大戟苗  
者誤也氣味苦微寒無毒治皮膚熱利水消腫丈夫陰  
氣不足利大小腸解蠱毒止瘧疾消痰退熱

### 甘遂

**增**本草綱目甘遂一名甘藁一名陵藁一名陵澤一名  
甘澤一名重澤一名苦澤一名白澤一名主田一名鬼  
醜蘇頌曰陝西江東有之苗似澤漆莖短小而葉有汁  
根皮赤肉白作連珠大如指頭氣味苦寒有毒治疝瘕

腹滿浮腫留飲宿食破癥堅積聚痰迷癩癩噎膈痞塞  
利水穀道瀉十二種水疾

### 續隨子

**增**本草綱目續隨子一名千金子一名千兩金一名苦  
薩豆一名拒冬一名聯步

蘇頌曰葉中出葉數數相續而生故名冬月始長故名

拒冬馬志曰生蜀郡處處亦有之苗如大戟蘇頌曰今南  
中多有北土產少苗如大戟初生一莖莖端生葉葉中  
復出葉花亦類大戟自葉中抽幹而生實青有殼人家  
園亭中多種以爲飾秋種冬長春秀秋實李時珍曰莖  
中亦有白汁可結水銀子去殼取色白者以紙包壓去  
油取霜用氣味辛溫有毒治癩血癥瘕疾癰除蠱毒鬼



症心腹痛冷氣脹滿利大小腸下惡滯物宣一切宿滯  
治肺氣水氣塗疥癬瘡

### 莨菪

**增**本草綱目莨菪一名天仙子一名橫唐一名行唐莨菪

一作藺蕩其子服之令人狂狼放宕故名蘇頌曰處處有之苗莖高二三尺

葉似地黃王不留行紅藍等而濶如三指四月開花紫色莖莢有白毛五月結實有殼作罌子狀如小石榴房中子至細青白色如粟米粒氣味苦寒有毒治齒痛出蟲肉痺拘急久服輕身使人健行走及奔馬強志益力通神見鬼多食令人狂走以甘草汁解之療癲狂風癇顛倒拘攣安心定志聰明耳目除邪逐風根氣味苦辛

有毒治邪瘧疥癬殺蟲

### 雲實

**增**本草綱目雲實一名員實一名雲英一名天豆一名

馬豆一名羊石子苗名草雲母一名臭草一名黏刺員

音雲其義未詳豆以子形名羊石當作羊矢其子肖之故也蘇恭曰大如黍及大麻

子等黃黑似豆叢生澤旁高五六尺葉如細槐亦如首  
藉枝間有微刺韓保昇曰所在平澤有之葉似細槐花  
黃白色其莢如豆其實青黃色大若麻子五月六月采  
實李時珍曰此草山原甚多俗名枯刺赤莖中空有刺  
高者如蔓其葉如槐三月開黃花纍然滿枝莢長三寸  
許狀如肥皂莢內有子五六粒正如鵲豆兩頭微尖有



黃黑斑紋厚殼白仁咬之極堅重有腥氣氣味辛溫無  
毒治泄痢腸澼殺蟲蠱毒去邪惡結氣止痛除寒熱消  
渴治瘧花治見鬼精多食令人狂走根治骨哽及咽喉  
痛研汁嚥之

蓖麻

**原** 蓖麻 蘇頌曰葉似大麻子形宛如牛蟬故名李時珍曰蓖亦作蠅蠅牛虱也其子有麻點故名蓖麻  
處處有之夏生苗莖中空有節色或赤或白葉如瓠葉  
凡五尖夏秋間極中抽出花穗纍纍黃色每枝結實數  
十顆上有軟刺如蝟毛一顆三四子熟時破殼子大如  
豆皮有白黑紋亦有白紫紋者形微長而末圓頭上小  
白點遠視之儼如牛蠅皮中有仁色嬌白甘辛平有小

毒氣味頗近巴豆善走能利人通諸竅經絡下水氣治  
偏風失音口禁口目喎邪頭風七竅諸病止諸痛消腫  
追膿拔毒催生下胞衣下有形諸物無刺者良有刺者  
毒此藥外用有奇功但內服不可輕易凡服蓖麻終身  
不得食炒豆犯之脹死其油服丹砂粉霜或言搗膏以  
筋點六畜舌根下即不能食點肛內即下血死今北方  
人種之田邊牛馬過者不食其毒可知

**集藻** 七言絕句 **增** 明陳憲章種蓖麻六首 山渠面面擁

蓖麻鎖盡春風一院花江上行人迷指顧老夫於此煉  
丹砂 短檠他夜照書牀一鱗蓖麻也借光老去圖書  
收拾盡只憑香几對羲皇 紅朶青條擺弄同人間無



地不春風莫輕此輩菀麻子也在先生藥圃中 菀麻  
得雨綠成畦如此風光亦老黎飲後小庵搜句坐山禽  
噉近竹門西 菀麻繞竹徑通雲雲裏樵歌隔竹聞手  
把長鑿種春雨風光吾與老黎分 種了菀麻合種瓜  
青山周折兩三家老夫來構茅茨畢別種秋風一徑花

附博落廻錄

**原**博落廻生江南山谷莖葉如菀麻莖空吹之作聲折  
之有黃汁大毒不可入口藥人立死治惡瘡癭瘤瘰肉  
瘡瘦白癩風此藥和百丈青雞桑灰等分爲末傅之蠱  
毒精魅當別有法

附錄黑天赤利子

**原**黑天赤利子似菀麻緣在地蔓上是顆兩頭尖有毒

常山

**增**本草綱目常山一名恒山一名互草一名雞屎草一

名鴨屎草一名蜀漆

李時珍曰恒亦常也恒山乃北岳名在今定州常山乃郡名亦今真

定豈此藥始產于此得名歟蜀漆乃常山苗功用相同

陶弘景曰出宜都建平細

實黃者呼爲雞骨常山用之最勝蘇恭曰生山谷間莖  
圓有節高者不過三四尺葉似茗而狹長兩兩相當二  
月生白花青萼五月結實青圓三子爲房其草暴燥色  
青白堪用若陰乾便黑爛鬱壞矣蘇頌曰今汴西淮浙  
湖南州郡亦有之而海州出者葉似楸葉八月有花紅  
白色子碧色似山楝子而小今天台山出一種草名土



常山苗葉極甘人用爲飲甘味如蜜又名蜜香草性涼益人非此常山也氣味苦寒有毒治傷寒寒熱發溫瘧鬼毒胸中痰結吐逆療鬼蠱水脹鼠瘦瘤瘰蜀漆氣味辛平有毒截瘧治欬逆寒熱癥痞積聚邪氣蠱毒鬼疰破血劫痰

**別錄增**炮炙論采時連根苗收如用莖葉臨時去根以甘草細剉同水拌濕蒸之臨時去甘草取蜀漆細剉又拌甘草水勻蒸日乾用凡用根以酒浸一宿漉出日乾熬搗用

附錄杜莖山

**增**圖經本草杜莖山莖高四五尺葉似苦蕒菜秋有花

冬作實如枸杞子大而白葉味苦寒主溫瘴寒熱作止不定煩渴頭痛心燥杵爛新酒浸絞汁服吐出惡涎甚效

附錄土紅山

**增**圖經本草土紅山生南恩州山野中大者高七八尺葉似枇杷而小無毛秋生白花如粟粒不實福州生者作細藤似芙蓉葉其葉上青下白根如葛頭土人取根米泔浸一宿以清水再浸一宿炒黃爲末生薑煎服治勞瘴甚效葉味甘微寒無毒治骨節疼痛勞熱瘴瘧

藜蘆

**增**本草綱目藜蘆一名山蔥一名蔥苒一名蔥茨一名



蔥葵一名豐蘆一名葱蔥一名鹿蔥

黑色曰藜其蘆有黑皮裹之故名根

際似蔥俗名蔥管藜蘆是矣北人謂之葱蔥南人謂之鹿蔥

蘇頌曰陝西山南東西

州郡皆有之遼州均州解州者尤佳三月生苗葉似初出櫻心又似車前莖似蔥白青紫色高五六寸上有黑皮裹莖似櫻皮有花肉紅色根似馬腸根長四五寸許黃白色二月三月采根陰乾此有二種一種水藜蘆莖葉大同只是生在近水溪澗石上根鬚百餘莖不中藥用今用者名蔥白藜蘆根鬚甚少只是三二十莖生高山者為佳均州土俗亦呼為鹿蔥氣味辛寒有毒治蠱毒欬逆洩痢腸澼頭瘍疥癩惡瘡殺諸蟲毒去死肌療噦逆喉痺鼻中息肉吐上膈風涎暗風癩病小兒鰕鮑

痰疾末治馬疥癬

附山慈石錄

**增**名醫別錄山慈石生山之陽正月生葉如藜蘆莖有衣一名爰苾氣味苦平無毒主女子帶下

附參果根錄

**增**名醫別錄參果根生百餘根根有衣裹莖三月三日采根一名百連一名烏蓼一名鼠莖一名鹿蒲味苦有

毒治鼠瘻

附馬腸根錄

**增**圖經本草馬腸根生秦州葉似桑三月采葉五月六月采根苦辛寒有毒治蠱除風葉療瘡疥



水藜蘆

**增**本草綱目水藜蘆一名黃藜蘆一名鹿驪鹿驪俚人呼爲黃藜蘆小樹也葉如櫻桃葉狹而長多皺紋四月開細黃花五月結小長子如小豆大氣味苦辛溫有毒治疥癬殺蟲

附子

**增**廣雅蕪葵毒附子也一歲爲煎子二歲爲烏喙三歲爲附子四歲爲烏頭五歲爲天雄本草綱目正者爲烏頭多岐者爲烏喙細長三四寸者爲天雄根旁如芋散生者爲附子旁連生者爲側子五物同出而異名蘇頌曰五者今並出蜀土苗高三四尺莖作四稜葉如艾

其花紫碧色作穗其實細小如桑椹狀黑色本只種附子一物成熟後乃有四物以長二三寸爲天雄割削附子旁尖角爲側子附子之絕小者亦名側子元種者爲烏頭其餘大小者皆爲附子以八角者爲上李時珍曰烏頭有兩種出彰明者卽附子之母今人謂之川烏頭春未生子故春采爲烏頭冬則生子已成故冬采爲附子其天雄烏喙側子皆是生子多者因象命名附子氣味辛溫有大毒治風寒欬逆邪氣寒濕踈躄拘攣破癥堅積聚血痕金瘡腰脊風寒心腹冷痛霍亂溫中暖脾胃除脾濕腎寒補下焦陽虛除臟腑沉寒三陽厥逆治三陰傷寒中風痰厥氣厥柔痊癰瘤暴瀉脫陽久痢寒



瘧瘴氣久病嘔噦反胃噎膈烏頭助陽退陰功同附子而稍緩

**彙考增**詩大雅堇荼如飴 國語寘堇於肉注賈逵曰

堇烏頭也 淮南子天下之物莫凶於雞毒然而良醫

橐而藏之有所用也注雞毒烏頭也 博物志烏頭天

雄附子一物春秋冬夏採各異也 明皇十七事玄宗

好神仙往往詔郡國徵奇士有張果者所爲變怪不測

上謂力士曰吾聞奇士至人外物不能敗其中試飲以

堇汁不死者乃奇士也會天寒甚乃使以汁進果果遂

飲盡二卮醇然如醉者顧曰非佳酒也 藥譜川烏頭

別名昌明童子 瑣碎錄滑臺風土極寒民啖附子如

啖芋栗 益部方物略記陶弘景以天雄烏頭附子皆

出建平謂之三建 癸辛雜識三建湯用附子川烏天

雄而莫曉其命名之義因觀謝靈運山居賦曰三建異

形而同出蓋三物皆一種類是知古藥命名皆有所本

祖也 明會典四川成都府歲貢天雄二十對附子五

十對烏頭五十對漏莖二十斤

**集藻記增**宋楊天惠彰明附子記 縣州故廣漢地領縣

八惟彰明出附子彰明領鄉二十惟赤水廉水會昌昌

明宜附子總四鄉之地爲田五百二十頃有奇然稅稻

之田五菽粟之田三而附子之田止居其二焉合四鄉

之產得附子一十六萬觔已上然赤水爲多廉水次之



而會昌昌明所出微甚凡上農夫歲以善田代處前期  
輒空田一再耕之蒔薺麥若巢糜其中比苗稍壯并根  
葉耨覆土下後耕如初乃布種每畝用牛十耦用糞五  
十斛七寸爲壟五寸爲符終畝爲符二十爲壟千二百  
壟從無衝深亦如之又以其餘爲溝爲涂春陽憤盈丁  
壯畢出疏整符壟以需風雨雨過輒振拂而駢持之既  
又挽草爲援以御短日其用工力比他田十倍然其歲  
獲亦倍稱成之凡四鄉度用種千斛以上出龍安及龍  
州齊歸木閑青槌小平者良其播種以冬盡十一月止  
采擷以秋冬九月止其莖類野艾而澤其葉類地麻而  
厚其花紫葉黃蕤長苞而圓其蓋其實之美惡視功之

勤窳以故富室之入常美貧者雖接畛或不盡然又有  
七月采者謂之旱水拳縮而小蓋附子之未成者然此  
物謂畏惡猥多不能常熟或種美而苗不茂或苗秀而  
不充或以釀而腐或以暴而孳若有物焉陰爲之故園  
人將采常禱於神或曰爲藥妖云其釀法用醞醅安密  
室淹覆彌月乃發以時暴涼久乾定方出釀時其大有  
如拳者已定不輒盈握故及兩者極難得蓋附子之品  
有七實本同而末異其初種之小者爲烏頭附烏頭而  
傍生者爲附子又左右附而偶生者爲鬲子又附而長  
者爲天雄又附而尖者爲天錐又附而上者爲側子又  
附而散者爲漏藍子皆脉絡連貫如子附母而附子以



廣羣芳譜 藥譜五  
貴故獨專附名自餘不得與焉凡種一而子六七以上則其實皆小種一而子二三則其實稍大種一而子特生則其實特大此其凡也附子之形以蹲坐正節角少為上有節多鼠乳者次之形不正而傷缺風皺者為下附子之色以花白為上鐵色次之青綠為下天雄烏頭天錐以豐實盈握為勝而漏藍側子園人以乞役夫不足數也大率蜀人餌附子者少惟陝輔閩浙宜之陝輔之賈纔市其下者閩浙之賈纔市其中者其上品皆士大夫求之蓋貴人金多喜奇故非得大者不厭然土人有知藥者云小者固難用要知半兩以上皆良不必及兩乃可此言近之按本經及志載附子出犍為山谷及

在山南嵩高齊魯間以今考之皆無有誤矣又曰春採為烏頭冬採為附子大謬又云附子八角者良其角為側子愈大謬與余所聞絕異豈所謂盡信書則不如無書者類耶

**贊增**宋宋祁附子贊附莖而生翠莖紫蕤生蜀者良三建則非

**七言絕句增**宋林景熙越州陶山附子岡洞霞疑接台峰近石棧空歌蜀道難一種靈苗人不識半山霜露夜痕乾

**別錄增**本草綱目韓保昇曰附子烏頭天雄側子烏喙采得以生熟湯浸半日勿令滅氣出以白灰裹之數易



使乾又法以米粥及糟麴等淹之並不及前法蘇頌曰  
五物收時一處造釀其法先於六月內造大小麴麴未  
采前半月用大麥煮成粥以麴造醋候熟去糟其醋不  
用大酸酸則以水解之將附子去根鬚於新瓮內淹七  
日日攪一徧撈出以疎篩攤之令生白衣乃向慢風日  
中曬之百十日以透乾爲度若猛日則皺而皮不附肉  
陶弘景曰凡用附子烏頭天雄皆熱灰微炮令拆勿過  
焦惟薑附湯生用之俗方每用附子須甘草人參生薑  
相配者正制其毒故也雷斅曰凡使烏頭宜文武火中  
炮令皺拆擘破用若用附子須底平有九角如鐵色一  
箇重一兩者卽是氣全勿用雜木火只以柳木灰火中

炮令皺拆以刀刮去上孕子并去底火擘破於屋下午  
地上掘一土坑安之一宿取出焙乾用若陰制者生夫  
皮尖底薄切以東流水并黑豆浸五日夜漉出日中曝  
用朱震亨曰凡烏附天雄須用童子小便浸透煮過以  
殺其毒并助下行之力入鹽少許尤好或以小便浸二  
七日揀去壞者以竹刀每箇切作四片并水淘淨逐日  
換水再浸七日曬乾用李時珍曰附子生用則發散熟  
用則峻補生用者須如陰制之法去皮臍入藥熟用者  
以水浸過炮令發拆去皮臍乘熟切片再炒令內外俱  
黃去火毒入藥又法每一箇用甘草二錢鹽水薑汁童  
便各半盞同煮熟出火毒一夜用之則毒去也



烏頭

**增**爾雅芟堇草注即烏頭也江東呼為堇 **本草綱目**

烏頭一名烏喙一名草烏頭按藥譜別一名土附子一名小昌明

名奚毒一名耿子一名毒公一名金鴉苗名莨一名獨

白草一名鴛鴦菊汁煎名射罔此即烏頭之野生于他處者俗謂之草烏頭亦

日竹節烏頭出江北者曰淮烏頭日華子所謂土附子者是也烏喙即偶生兩岐者今俗呼為兩頭尖因形而

名其實乃一物也附子天雄之偶生兩岐者亦謂之烏喙非此烏頭也草烏頭取汁曬為毒藥射禽獸故有射罔之

稱吳普曰正月始生葉厚莖方中空葉四四相當與

蒿相似陶弘景曰今采用四月亦以八月采搗莖汁煎

為射罔獵人以傅箭射禽獸十步即倒中人亦死宜速

解之李時珍曰處處有之根苗實並與川烏頭相同但

此係野生又無釀造之法其根外黑內白皺而枯燥為異爾然毒則甚焉氣味辛溫治中風除寒濕痺欬逆上氣破積聚寒熱消冷痰痞治頭風喉痺癰腫疔毒乃至毒之藥非風頑急疾不可輕投

白附子

**增**本草綱目白附子因與附子相似故各實非附子類也蘇恭曰本出高

麗今出涼州以西生砂磧下濕地獨莖似鼠尾草細葉

周匝生於穗間根形似天雄李珣曰徐表南州異物記

云生東海新羅國及遼東苗與子相似李時珍曰根正

如草烏頭之小者長寸許乾者皺紋有節氣味辛甘大

溫有小毒治心痛血痺行藥勢中風失音一切冷風氣



面疔癩疵

**彙考**增**楚國先賢傳**孔休傷頰有癩王莽賜玉屑白附

子香與之消癩 **西陽雜俎**藥草異號章陽羽白附子

也

### 天南星

**增**本草綱目天南星一名虎掌一名虎膏一名鬼蒟蒻

蘇頌曰天南星即虎掌小者名由跋李時珍曰虎掌因葉形似之天南星因根圓白如老人星狀故名蘇

頌曰虎掌河北州郡有之初生根如豆大漸長大似半

夏而扁年久者根圓及寸大者如雞卵周匝生圓牙三

四枚或五六枚三四月生苗高尺餘獨莖上有葉如爪

五六出分布尖而圓一窠生七八莖時出一莖作穗直

上如鼠尾中生一葉如匙裏莖作房旁開一口上下尖

中有花微青褐色結實如麻子大熟即白色自落布地

一子生一窠九月苗殘取根又曰天南星處處平澤有

之二月生苗似荷梗其莖高一尺以來葉如蒟蒻兩枝

相抱五月開似蛇頭黃色七月結子作穗似石榴子紅

色二月八月采根似芋而圓扁氣味苦溫有大毒治心

痛寒熱結氣積聚伏梁傷筋痿拘緩利水道除陰下濕

風眩疝瘕傷寒時疾中風麻痺除痰下氣利胸膈攻堅

積消癰腫傳金瘡疥癬蛇蟲咬傷

**彙考**增**藥譜**天南星別名半夏精 **文房寶飾**以竹梢

甘露和天南星漬紙一宿裁之刀去如飛



附錄 虎掌草

**增**圖經本草江州一種草葉大如掌面青背紫四畔有牙如虎掌生三四葉為一本冬青不結花實治心疼寒熱積氣

菟藟

**增**本草綱目菟藟一名菟頭一名鬼芋出蜀中施州亦有之呼為鬼頭閩中人亦種之宜樹陰下掘坑積糞春時生苗至五月移之長一二尺與南星苗相似但多斑點宿根亦自生苗經二年者根大如碗及芋魁其外理白味亦麻人秋後采根須淨擦或搗或片段以醃灰汁煮十餘沸以水淘洗換水更煮五六遍即成凍子切片

以苦酒五味淹食不以灰汁則不成也切作細絲沸湯灼過五味調食狀如水母絲馬志言其苗似半夏楊慎丹鉛錄言菟醬即此者皆誤也氣味辛寒有毒磨傅癰腫風毒製食主消渴

附錄 菩薩草

**增**圖經本草菩薩草生江浙州郡凌冬不凋秋冬有花直出赤子如菟頭冬月采根用味苦無毒酒研服治諸毒搗傅諸蟲傷婦人妊娠欬嗽蜜丸服

半夏

**原**半夏一名水玉一名守田一名地文本草綱目云禮記月令五月半

夏生蓋當夏之半也故名一名和姑在處有之齊州者



爲良二月生苗一莖莖端三葉淺綠色頗似竹葉三三  
相偶而生江南者似芍藥白花圓上生平澤者甚小名  
羊眼半夏圓白爲勝五月採則虛小八月乃實大陳久  
更佳氣味辛平有毒生微寒令人吐熟溫令人下射干  
柴胡爲之使忌羊血海藻飴糖惡皂角畏雄黃秦皮龜  
甲反烏頭消痰熱滿結欬嗽上氣心下急痛時氣嘔逆  
除腹脹目不得瞑

**集藻**五言古詩增宋孔平仲常父寄半夏齊州多半夏  
採自鵲山陽纍纍圓且白千里遠寄將新婦初解包諸  
子喜若狂皆云已法製無滑可以嘗大兒強占據端坐  
斥四旁次女出其腋一攫已半亡小兒作蟹行乳媪代

與攘分頭各咀嚼方愛有所忘須臾被辛螫棄餘不復  
藏競以手捫舌啼噪滿中堂父至笑且驚亟使啖以薑  
中宵方稍定久此燈燭光大鈞播萬物不擇窳與良虎  
掌出深谷鳶頭蔽高岡春草善殺魚野葛挽人腸各以  
類自蕃敢問孰主張水玉名雖佳神農錄之方其外則  
皎潔其中慕堅剛柰何蘊毒性入口有所傷老兄好服  
食似此亦可防急難我輩事感惕成此章

七言絕句增唐王建寄劉蕡問疾年少病多應爲酒誰  
家將息過今春賒來半夏重薰盡投著山中舊主人

別錄原修治洗去皮垢以湯泡浸七日逐日換湯眼乾  
切片薑汁拌焙入藥或研爲末以薑汁入湯浸澄三日



瀝去涎水曬乾用謂之半夏粉或研末以薑汁和作餅  
子曰乾用謂之半夏餅或研末以薑汁白礬湯和作餅  
楮葉包置籃中待生黃衣日乾用謂之半夏麴白飛霞  
醫通云痰分之病半夏爲主造而爲麴尤佳治濕痰以  
薑汁白礬湯和之治風痰以薑汁及皂莢煮汁和之治  
火痰以薑汁竹瀝或荆瀝和之治寒痰以薑汁礬湯入  
白芥子末和之此皆造麴妙法也 辨訛江南半夏大  
乃徑寸葉似芍藥根下相重上大下小皮黃肉白南人  
特重之用之始知其異此乃由跋類半夏而苗不同誤  
以爲半夏也 白傍薺子絕似半夏但咀之微酸不堪  
入藥

蚤休

**增**本草綱目蚤休一名蚩休一名螯休一名紫河車一

名重臺一名重樓金線一名三層草一名七葉一枝花

一名草甘逐一名白甘逐 蟲蛇之毒得此治之卽休故  
有蚤休螯休諸名重臺三層

因其葉狀也金線重樓因其花狀也甘  
逐因其根狀也紫河車因其功用也處處有之生于

深山陰濕之地一莖獨上莖當葉心葉綠色似芍藥凡

二三層每一層七葉莖頭夏月開花一花七瓣有金絲

蕊長三四寸王屋山產者至五七層根如鬼臼蒼朮狀

外紫中白有黏糯二種外丹家采制三黃砂汞入藥洗

切焙用俗諺云七葉一枝花深山是我家癰疽如遇者

一似手拈拏是也氣味苦微寒有毒治驚癇搖頭弄舌



熱氣在腹中癩疾癰瘡除蝕下三蟲去蛇毒治胎風手足搖能吐泄瘰癧去瘡疾寒熱

**集藻** **五言古詩** **增** 宋范成大紫荷車綠英吐弱線翠葉抱修莖蠹如青旄節草中立亭亭根有却老藥鱗皴友松苓長生不暇學聊冀病身輕

**別錄** **增** 服食經紫河車根以竹刀刮去皮切作骰子大塊麪裹入瓷瓶中水煮候浮漉出凝冷入新布袋中懸風處待乾每服三九五更初面東念咒井水下連進三服即能休糧若要飲食先以黑豆煎湯飲之次以藥丸煮稀粥漸漸食之咒曰天朗氣清金雞鳴吾今服藥欲長生吾今不饑復不渴賴得神仙草有靈

鬼臼

**增** 本草綱目鬼臼一名九日一名天日一名鬼藥一名

解毒一名爵犀一名馬日毒公一名害母草一名羞天

花 詳見益部 一名木律草一名孺田草 詳見山谷詩注 一名獨

脚蓮一名獨荷草一名山荷葉一名旱荷一名八角盤

一名唐婆鏡 此物有毒而曰如馬眼故名馬日毒公殺

新苗生則舊苗死故有 蘇頌曰今江寧府滁舒商齊杭

襄峽州荆門軍皆有之花生莖間赤色三月開花後結

實一說鬼臼生深山陰地葉六出或五出如鴈掌莖端

一葉如繖且時東向及暮則西傾蓋隨日出沒也花紅

紫如荔枝正在葉下常為葉所蔽未常見日一年生



莖既枯則生一曰及八九年則八九日矣然一年一曰生而一曰腐蓋陳新相易也李時珍曰考鄭樵通志云鬼曰葉如小荷形如鳥掌年長一莖莖枯則根爲一白亦名八角盤以其葉似之也據此則是今人所謂獨腳蓮者也南方處處深山陰密處有之北方惟龍門山王屋山有之一莖獨上莖生葉心而中空一莖七葉圓如初生小荷葉面青背紫揉其葉作瓜李香開花在葉下亦有無花者其根全似蒼朮紫荷車丹爐家采根制三黃砂汞或云其葉八角者更靈或云其根如紫荷車一樣但以白色者爲河車赤色者爲鬼白恐亦不然而庚辛玉冊謂蚤休陽草旱荷陰草亦有分別陶弘景以馬

目毒公與鬼白爲二物殊不知正是一物而有一二種也又唐獨孤滔丹房鏡源云木律車有二種根皆似南星赤莖直上莖端生葉一種葉凡七瓣一種葉作數層葉似蓖麻面青背紫而有細毛葉下附莖開一花狀如鈴鐸倒垂青白色黃蕊中空結黃子風吹不動無風自搖可制砂汞按此卽鬼白之二種也其說形狀甚明氣味辛溫有毒殺蟲毒鬼疰精物辟惡氣不祥逐邪解百毒治風疾邪瘧癰疽下息胎

**彙考** **增** 益部方物略記羞寒花蜀地處處有之不爲人

所愛根莖綴花蔽葉自隱俗曰羞天花予易爲羞寒花

**山谷詩注**子瞻詩所記胡道士玉芝一名瓊田草者



俗號其葉爲唐婆鏡葉底開花故號羞天花以予考之其實本草之鬼曰也歲生一曰如黃精而堅瘦滿十二歲可爲藥就土中生根取一曰勿令大本知也煮麩如餛飩皮裹一曰吞之數日不饑啗三曰可辟穀也黃龍山老僧多採而斷食令人體臞而神王今方家所用鬼曰乃鬼燈檠耳如蜀人用鬼箭但用一草根不知何物也鎮陽趙州間道傍叢生三羽者真鬼箭俗醫用藥如此而責古方不治病可勝歎哉因論玉芝故并記之

**集藻贊增**宋宋祁羞寒花贊冒寒而茂莖修葉廣附莖作花葉蔽其上以其自蔽若有羞狀

七言古詩**增**宋黃庭堅瓊芝軒卓仙在時養瓊芝深根

固帶活人命憧憧來問此何草但告渠是唐婆鏡

射干

**增**廣雅鳶尾射干也 本草綱目射干一名烏扇一名

烏嬰一名烏吹一名烏蒲一名鳳翼一名鬼扇一名扁

竹一名仙人掌一名紫金牛一名野萱花一名草薑一

名黃遠蘇頌曰莖梗疎長正如射之長竿之狀故名李時珍曰其葉叢生橫鋪一面如鳥翅及扇之狀

故有烏扇諸名俗呼扁竹謂其葉扁生而根如竹也根葉又如蠻薑故曰草薑蘇恭曰鳶尾葉

都似射干而花紫碧色不抽高莖根似高良薑而肉白

名鳶頭陳藏器曰射干鳶尾二物相似人多不分射干

卽人間所種爲花草名鳳翼者葉如鳥翅秋生紅花赤

點鳶尾亦人間所種苗低下於射干狀如鳶尾夏生紫



碧花者是也蘇頌曰今在處有之人家種之春生苗高一二尺葉大類蠻薑而狹長橫張疎如翅羽狀故名烏嬰葉中抽莖似萱草莖而強硬六月開花黃紅色瓣上有細文秋結實作房中子黑色李時珍曰射干卽今扁竹也今人所種多是紫花者呼爲紫蝴蝶其花三四月開六出大如萱花結房大如拇指頗似泡桐子一房四隔一隔十餘子子大如胡椒而色紫極硬咬之不破七月始枯陶弘景謂射干鳶尾是一種蘇恭陳藏器謂紫碧花者是鳶尾紅花者是射干韓保昇謂黃花者是射干蘇頌謂花紅黃者是射干白花者亦其類朱震亨謂紫花者是射干紅花者非按土宿真君本草云射干卽

扁竹葉扁生如側手掌形莖亦如之青綠色一種紫花一種黃花一種碧花多生江南湖廣川浙平陸間八月取汁煮雄黃伏雌黃制丹砂能拒火據此則鳶尾射干本是一類但花色不同正如牡丹芍藥菊花之類其色各異皆是同屬也大抵入藥功不相遠氣味苦平有毒治欬逆上氣喉痺咽痛散結氣腹中邪逆食飲大熱消痰破癥結水蠱消結核利大腸治瘧母摩塗毒腫

**彙考**

**增**

夏小正

十一月

廣莫風

至則蘭

射干生

**圖經**

本草射干多生山厓之間其莖雖細小亦類木故荀子云西方有木名曰射干莖長四寸生于高山之上 **易**通卦驗冬至射干生



集藻文賦散句增漢司馬相如上林賦藁本射干劉  
向九歎掘荃蕙與射干兮

坐拏草

增圖經本草坐拏草生江西及滁州六月開紫花結實  
采其苗入藥甚易得後因人用有效今頗貴重氣味辛  
熱有毒治風痺壯筋骨兼治打撲傷損

押不蘆

增癸辛雜識回回地方有草名押不蘆土人以少許磨  
酒飲即通身麻痺而死加以刀斧亦不知至三日則以  
少藥投之即活御藥院中亦儲之 湛淵集詩注漠北  
有草名押不蘆食其汁立死以他藥解之即蘇華陀洗

腸胃攻疾疑先服此 滇載記押不蘆北方起死回生  
草也

集藻五言絕句增元白琿續演雅草食押不蘆雖死元  
不死未見滌腸人先聞棄簣子

芫花

增本草綱目芫花一名杜芫一名赤芫一名去水一名  
毒魚一名痛頭花一名兒草一名敗華根名黃大戟一

名蜀桑 芫或作杭義未詳去水言其功毒魚言其性  
大戟言其似也俗人因其氣惡呼為頭痛花 韓

保昇曰近道處處有之苗高二三尺葉似白前及柳葉  
根皮黃似桑根正月二月花發紫碧色葉未生時收采  
日乾葉生花落即不堪用也蘇頌曰在處有之宿根舊



枝莖紫長一二尺根入土深三五寸白色似榆根春生  
苗葉小而尖似楊柳枝葉二月開紫花頗似紫荊而作  
穗又似藤花而細今絳州出者花黃謂之黃芫花氣味  
辛溫有小毒治欬逆上氣喉鳴喘咽腫短氣蟲毒鬼瘧  
疝瘕癰腫殺蟲魚去水利痰通利血脉治惡瘡風痺一  
切毒風四肢攣急

**別錄增**本草綱目芫花留數年陳久者良用時以好醋  
煮十數沸去醋以水浸一宿曬乾用則毒滅也或以醋  
炒者次之

### 蕘花

**增**本草綱目蕘花

蕘者饒也其  
花繁饒也

蘇恭曰苗似胡荽莖無

刺花細黃色四月五月收韓保昇曰所在有之以雍州  
者爲好生岡原上苗高二尺許李時珍曰按蘇頌圖經  
言絳州所出芫花黃色謂之黃芫花其圖小株花成簇  
生恐卽此蕘花也生時色黃乾則如白故陶氏言細白  
也氣味苦寒有毒治傷寒溫瘧下十二水破積聚大堅  
癥瘕蕘滌胸中留癖飲食寒熱邪氣利水道療痰飲欬  
逆上氣喉中腫滿疰氣蠱毒

### 醉魚草

**增**本草綱目醉魚草一名鬧魚花一名魚尾草一名橈  
木南方處處有之多在塹岸邊作小株生高者三四尺  
根狀如枸杞莖似黃荊有微稜外有薄黃皮校易繁衍



葉似水楊對節而生經冬不凋七八月開花成穗紅紫色儼如芫花一樣結細子漁人采花及葉以毒魚盡圍圍而死呼為醉魚兒草池沼邊不可種之此花色狀氣味並如芫花毒魚亦同但花開不同時為異爾氣味辛苦溫有小毒治痰飲解魚毒化魚骨鯁

### 莽草

**增**本草綱目莽草一名茵草一名芒草一名鼠莽陶弘景曰莽本作茵字俗訛呼爾李時珍曰此物有毒食之令人迷罔故名山人以毒鼠謂之鼠莽陶弘景曰今東間處處皆有葉青辛烈者良又用搗以和陳粟米粉納水中魚吞即死浮出人取食之無妨蘇頌曰今南中州郡及蜀川皆有之木若石楠而葉稀無花實五月

七月采葉陰乾一說藤生繞木石間既謂之草乃藤生者是也寇宗奭曰莽草諸家皆謂之草而本草居木部今世所用皆木葉如石楠葉枝硬乾則皺揉之其臭如椒氣味辛溫有毒治風頭癰腫乳癰疔痕喉痺癩癧除結氣疥癢殺蟲魚

**彙考增**周禮秋官翦氏掌除蠹物以攻崇攻之以莽草薰之 范子計然莽草出三輔青色者善

### 茵芋

**增**本草綱目茵芋一名芫草一名卑共陶弘景曰好者出彭城今近道亦有莖葉狀似莽草而細軟連細莖采之方用甚稀惟合療風酒大明曰出自海鹽形似石楠



樹生葉厚五六七月采蘇頌曰今雍州絳州華州杭州亦有之春生苗高三四尺莖赤葉似石榴而短厚又似石楠葉四月開細白花五月結實三月四月七月采莖葉日乾氣味苦溫有毒治五臟邪氣心腹寒熱羸瘦如瘧狀發作有時諸關節風濕痺痛

### 苦莖

**增爾雅**齧苦莖注今莖葵也葉似柳子如米泔食之滑疏本草唐本注云此菜野生非人所種俗謂之莖菜葉似葢紫花本草云味甘而此云苦者古人語倒猶甘草謂之苦也 **本草綱目**苦莖一名石龍芮一名地樵一名天豆一名石能一名魯果能一名水莖一名胡椒菜

一名彭根

陶弘景曰生于石上其葉芮芮短小故名石龍芮蘇恭曰實如桑椹故各地樵李時珍曰

芮芮細貌其樵之子細芮故名地樵以下皆子名也水莖以下皆苗名也苗作蔬食味辛而滑故有椒葵之名

蘇恭曰水莖苗似附子實如桑椹生下濕地五月熟葉子皆味辛山南者粒大如葵子關中河北者細如葶藶氣力劣於山南者蘇頌曰今惟出兗州一叢數莖莖青紫色每莖三葉其葉短小多刻缺子如葶藶而色黃李時珍曰水莖處處有之多生近水下濕地高者尺許其根如薺三月生苗叢生圓莖分枝一枝三葉葉青而光滑有三尖多細缺江淮人三四月采苗淪過曬蒸黑色為蔬四五月開細黃花結小實大如豆狀如初生桑椹青綠色槎散則子甚細如葶藶子即石龍芮也宜半老



時采之氣味苦平無毒治風寒濕痺心腹邪氣利關節  
止煩滿久服輕身明目不老莖葉氣味甘寒無毒搗汁  
洗馬毒塗蛇蝎毒及癰腫

**彙考增**禮記內則莖苴粉榆兔薹滫瀡以滑之 **晉書**

**孝義傳**劉殷祖母王氏冬月思莖殷時年九歲乃於澤  
中慟哭聲不絕者半日忽若有人云止止殷收淚視地  
有莖生焉因得斛餘以供母 **范子計然**石龍芮出三

輔色黃者善

### 毛茛

**增**本草綱目毛茛一名毛建草一名水茛一名毛莖一

名天灸一名自灸一名猴蒜 李時珍曰莖乃草烏頭之  
苗此草形狀及毒皆似之

故名肺後方謂之水茛又名毛建亦莖字音訛也俗名  
毛莖似水莖而有毛也山人截瘡采葉按貼寸口一夜  
作泡如火燎故下濕處多有春生苗高者尺餘一枝三  
呼爲天灸自灸

葉葉有三尖及細缺與石龍芮莖葉一樣但有細毛爲  
別四五月開小黃花五出甚光艷結實狀加欲綻青柔  
樞如有尖峭與石龍芮子不同人以為鶩不食草者大  
誤也方士取汁煮砂伏硫沈存中筆談所謂石龍芮有  
兩種水生者葉光而末圓陸生者葉毛而末銳此即葉  
毛者氣味辛溫有毒治惡瘡癰腫未潰者搗葉傅之不  
得入瘡令肉爛葛洪百一方云水茛生水旁有毒蟹多  
食之人誤食之狂亂如中風狀或吐血以甘草汁解之

### 海薑

廣雅

海薑 陰命 牛扁

三



增本草經注海薑生海中赤色狀如石龍芮有大毒

陰命

增本草經注陰命生海中赤色著木懸其子有大毒

牛扁

增本草綱目牛扁一名扁特一名扁毒蘇恭曰田野人各為牛扁療牛

風甚效太常名扁特或各扁毒蘇恭曰此藥似堇草石龍芮輩根如秦

芄而細蘇頌曰今潞州一種便特六月有花八月結實

采其根苗搗末油調殺蟻虱主療大都相似疑即扁特

也但聲近而字訛耳氣味苦微寒無毒治身皮瘡熱氣

可作浴湯殺牛虱小蟲又療牛病

附錄 虱建草

增本草拾遺虱建草生山足濕地發葉似山丹微赤高

一二尺味苦無毒主蟻虱按汁沐頭虱盡死人有誤吞

虱成病者搗汁服一小合亦主諸蟲瘡又有水竹葉生

水中葉如竹葉而短小可生食亦去蟻虱

蕁麻

增本草綱目蕁麻一名毛蕁川黔諸處甚多其莖有刺

高二三尺葉似花桑或青或紫背紫者入藥上有毛芒

可畏觸人如鋒螫螫蠶以人溺濯之即解有花無實冒

冬不凋按投水中能毒魚氣味辛苦寒有大毒吐利人

不止治蛇毒搗塗之

彙考增杜詩注除草去蕁草也東坡集杜甫有除蕁

蕁麻 格注草



詩言草有害於人然治風癭擇最先者以此草點之一  
身皆失去葉背紫者入藥據此說藝亦能療疾棄瑕錄  
用可也

**集藻** **五言古詩** **增** 唐杜甫除草詩草有害於人曾何生  
阻修其毒甚蜂蠆其多彌道周清晨步前林江色未散  
憂芒刺在我眼焉能待高秋霜露一霑凝蕙葉亦難留  
荷勸先童稚日入仍討求轉致水中央豈無雙釣舟頑  
根易滋蔓敢使依舊丘自茲藩籬曠更覺松竹幽芟夷  
不可闕疾惡信如讐

格注草

**增** 唐本草格注草出齊魯山澤間葉似蕨根紫色若紫  
草根一株有二十許二月八月采根五月六月采苗日  
乾用氣味辛苦溫有大毒治蠱疰諸毒疼痛

海芋

**增** 益部方物略記海芋生不高四五尺葉似芋而有根  
榦根皮不可食方家號隔河仙云可變金或云能止瘧  
[本草綱目]海芋一名觀音蓮一名羞天草一名天荷  
生蜀中今亦處處有之春生苗高四五尺夏秋間抽莖  
開花如一瓣蓮花碧色花中有蕊長作穗如觀音像在  
圓光之狀故俗呼爲觀音蓮其根似芋魁大者如升盃  
長六七寸蓋野芋之類也庚辛玉册云羞天草陰草也  
生江廣深谷澗邊其葉極大可以禦雨葉背紫色花如



蓮花根葉皆有大毒可煨粉霜硃砂小者名野芋氣味辛有大毒治瘧瘴毒腫風癩

**集藻贊增**宋宋祁海芋贊木榦芋葉擁踵盤戾農經弗載不用治厲

鉤吻

**增**博物志鉤吻草與苕華相似 南方草木狀野葛蔓

生葉如羅勒光而厚一名胡蔓草人以雜生蔬中毒人

半日輒死 酉陽雜俎胡蔓草生邕容間叢生花扁如

支子稍大不成朶色黃白葉稍黑誤食之數日卒飲白

鶯鴨血則解或以一物投之祝曰我買你食之則立死

**本草綱目**鉤吻一名野葛一名毒根一名胡蔓草一

名斷腸草一名黃藤一名火把花

陶弘景曰言其入口則鉤人喉吻也或言

吻當作挽字牽挽人腸而絕之也李時珍曰此草雖名野葛非葛根之野者也或作治葛王充論衡云治地名

也在東南廣人謂之胡蔓草亦曰斷腸草入人畜腹內即黏腸上半日則黑爛又名爛腸草滇人謂之火把花

因其花紅而性熱如火也岳州謂之黃藤生傳高山谷及會稽東野折之青烟出者各固活吳普云秦鉤吻一

名除蘇恭曰野葛生桂州以南村墟間巷間皆有彼人

通名鉤吻亦謂苗為鉤吻根名野葛蔓生其葉如柿其

根新采者皮白骨黃宿根似地骨嫩根如漢防已皮節

斷者良正與白藤相類新者折之無塵氣經年以後則

有塵起從骨之細孔出人食其葉立死李時珍曰南人

云鉤吻即胡蔓草今人謂之斷腸草是也蔓生葉圓而

光春夏嫩苗毒甚秋冬枯老稍緩五六月開花似檉柳



花數十朵作穗生嶺南者花黃生滇南者花紅氣味辛  
溫有大毒陳藏器曰薤菜搗汁解野葛毒取汁滴野葛  
卽萎死南人先食薤菜後食野葛二物相伏自然無苦  
李時珍曰葛洪肘後方云凡中野葛毒口不可開者取  
大竹筒洞節以頭拄其兩脇及臍中灌冷水入筒中數  
易水須臾口開乃可下藥解之惟多飲甘草汁人尿汁  
白鴨或白鶩斷頭瀝血入口中或羊血灌之嶺南衛生  
方云卽時取雞卵抱未成雛者研爛和麻油灌之吐出  
毒物乃生稍遲卽死也

**彙考增** **三國志注** 魏太祖習噉野葛至一尺 **博物志**  
太陰之草名曰鉤吻不可食入口卽死 **神農經**曰藥

物有大毒不可入口鼻耳目者卽殺人一曰鉤吻盧氏  
曰陰地黃精不相連根苗獨生者是也

**集藻** **五言古詩** **增** 唐白居易有木詩有木香苒苒山頭  
生一發主人不知名移種近軒闥愛其有芳味因以調  
麴蘖前後曾飲者十人無一活豈徒悔封植兼亦誤采  
掇試問識藥人始知名野葛年深已滋蔓刀斧不可伐  
何時猛風來爲我連根拔

### 透山根

**增** **本草綱目** 按岫嶠神書云透山根生蜀中山山谷草類  
蘼蕪可以點鐵成金昔有人采藥誤斫此草刀忽黃軟  
成金也又庚辛玉冊云透山根出武都取汁點鐵立成



廣羣芳譜 藥譜五  
黃金有大毒人誤食之化爲紫水又有金英草亦生蜀  
中狀如馬齒莧而色紅摸鐵成金亦有大毒入口殺人  
須臾爲紫水也又何遠春渚紀聞云劉均父吏部罷官  
歸成都有水銀一篋過峽篋漏急取渡旁叢草塞之久  
而開視盡成黃金矣宋初有軍士在澤州澤中割馬草  
歸鎌皆成金以草燃釜亦成黃金又臨安僧法堅言有  
客過於潛山中見一蛇腹脹嚙一草以腹磨之而消念  
此草必能消脹取置篋中夜宿旅館聞鄰房有人病腹  
脹呻吟以釜煎藥一杯與服頃之不復聞聲念已安矣  
至日視之其人血肉俱化爲水獨骸骨在牀爾視其釜  
則通體成金矣觀何氏所載卽是透山根乃金英草之  
類如此毒草不可不知故備載之耳



佩文齋廣羣芳譜卷第九十七

佩文齋廣羣芳譜卷第九十八

藥譜

兔絲

女蘿別見木譜

**原**兔絲一名兔縷一名兔蘂一名兔蘆一名兔丘廣雅云兔

丘兔絲也一名女蘿埤雅云在木為女蘿在草為兔絲一名赤網一名玉女

爾雅云蒙玉女注云即唐也一名唐蒙爾雅云唐蒙女蘿女蘿兔絲一名火燄草

庚辛玉冊云火燄云即兔絲子一名狐絲一名金線草蔓生處處有之

以冤句者為勝生懷孟林中及黑豆上者入藥更良夏

生苗色紅黃如金細絲遍地不能自起得草梗則纏繞

而生其子入地初生有根及長延草物其根自斷無葉

有花白色微紅香亦襲人結實如粃豆而細色黃生於



梗上味辛甘平無毒主續絕傷補不足益氣力肥健人  
堅筋骨添精益髓養肌去腰痛膝冷久服明目輕身延  
年去面黥悅顏色

**彙考**

**原**詩小雅薦與女蘿施于松柏

**增**

史記龜策傳

下有茯苓上有兔絲

呂氏春秋或謂兔絲無根也其

根不屬地茯苓是也

淮南子兔絲無根而生茯苓抽

兔絲死

博物志女蘿寄生兔絲兔絲寄生木上生根

不著地

抱朴子兔絲之草下有伏兔之根無此兔在

下則絲不得生於上然實不屬也

兔絲初生之根其

形似兔掘取剖其血以和丹服之立變化任意所作

酉陽雜俎兔絲子多近棘及藿山居者疑二草之氣類

也

**集藻**

**五言古詩**

**原**

宋謝朓詠兔絲輕絲既難理細縷竟

無織爛熳已萬條連綿復一色安根不可知縈心終不

測所貴能卷舒伊用蓬生直

唐李太白古意君爲女蘿

草妾作兔絲花輕條不自引爲逐春風斜百丈託遠松

纏綿成一家誰言會面易各在青山厓女蘿發馨香兔

絲斷人腸枝枝相糾結葉葉竟飄揚生子不知根因誰

共芬芳中巢雙翡翠上宿紫鴛鴦若識二草心海潮亦

可量

**元稹**

兔絲人生莫依倚依倚事不成君看兔絲

蔓依倚榛與荆荆榛易蒙密百鳥撩亂鳴下有狐兔穴

奔走亦縱橫樵童斫將去柔蔓與之并翳蒼生可恥束



縛死無名桂樹月中出珊瑚石上生俊鵲渡海食應龍  
升天行靈物本特達不復相纏縈纏縈竟何者荆棘與  
飛莖 **增**明薛蕙兔絲根株不自立枝蔓為誰飾偶同  
雜俎文未比朱絃直園客何由整天女詎堪織暫附松  
柏枝終辭霜露色

詩散句 **原**梁江淹兔絲附女蘿引蔓故不長 兔絲及

水萍所寄終不移 **增**金雷瑄綿綿兔絲草 唐喬知

之南山羃羃兔絲花 **陸龜蒙**教疎兔縷金絃亂

**別錄原**修治凡用以溫水淘去沙泥酒浸一宿曝乾搗

之不盡者再浸曝搗須臾悉細又法酒浸四五日蒸曝

四五次研作餅焙乾再研末或云曝乾時入紙條數枚

同搗卽刻成粉且省力也 **辨訛**勿使天碧草子真相

似但味酸澀并黏也 **服食**抱朴子仙方單服法兔絲

子一斗酒一斗浸曝乾再浸又曝酒盡乃止搗篩為末

每酒服二錢日二服治腰膝去風明目久服令人光澤

老變為少十日外飲啖如湯沃雪

五味子

**增**爾雅葎莖藟 **注**五味也 **疏**按本草五味子一名會及

一名玄及唐本注云五味皮肉甘酸核中辛苦都有鹹

味此則五味具也 **圖經**本草五味春初生苗引赤蔓

於高木其長六七尺葉尖圓似杏葉三四月開黃白花

類蓮花狀七月成實叢生莖端如豌豆許大生青熟紅



紫入藥生曝不去子今有數種大抵相近雷斅言小顆皮皺泡者有白撲鹽霜一重其味酸鹹苦辛甘皆全者為真也  
〔本草綱目〕南產者色紅北產者色黑氣味酸溫無毒益氣治欬逆上氣勞傷羸瘦補不足養五臟除熱生肌治中下氣止嘔逆補虛勞令人體悅澤明目暖水臟壯筋骨治風消食治反胃霍亂轉筋疰癘奔豚冷氣消水腫心腹氣脹止渴除煩熱解酒毒生津止渴治瀉痢補元氣不足收耗散之氣

**彙考**增抱朴子五味者五行之精其子有五味淮南公羨門子服之十六年面色如玉女入水不濡入火不灼  
覆盆子

**原**覆盆子李氏藥錄云子似覆盆之形故名一名缺盆一名莖爾雅云莖蒺藜

注云覆盆也一名插田蔗一名烏蔗子一名大麥苒一名栽

秧蔗本草綱目云五月子熟其色烏赤故有諸名一名西國草一名畢楞伽

見海上一名馬瘦一名陸荆見藥性本草處處有之秦吳尤

多藤蔓莖有鈎刺一枝五葉葉小面青背微白光薄無毛開白花四五月實成子小於蓬蘽而稀疎味酸甘外如荔支大如指頂軟紅可愛生青黃熟烏赤山中人及時采賣少遲則就枝生蛆食之五六分熟便采烈日曝乾不爾易爛氣味甘平無毒益氣輕身補虛續絕益腎明目悅澤肌膚安和五臟

**彙考**原夷堅志潭州趙太尉母病爛弦疔眼二十年有

覆盆子



老嫗云此中有蟲吾當除之入山取草蔓葉咀嚼留汁入筒中還以皂紗蒙眼滴汁漬下弦轉盼間蟲從紗上出數日下弦乾復如法滴上弦又得蟲數日而愈後以治人多驗乃覆盆子葉也蓋治眼妙品

**集藻**五言古詩增宋王右丞覆盆子靈根茂永夏幽磴羅深叢晶華發鮮澤葉實分青紅搜尋犯晨露採摘勤村童籍以烟筍籜貯之霜筠籠

**別錄**原修治采得揀淨搗作薄餅曬乾密貯臨時酒拌蒸用采時不見水取汁作煎為果著水則不堪煎

### 蓬蘽

增本草綱目一名覆盆一名陵蘽一名陰蘽一名寒莓

李時珍曰蓬蘽與覆盆同類故別錄謂一名覆盆此種生於丘陵之間藤葉繁衍蓬蓬蘽蘽異於覆盆故曰蓬蘽陵蘽即藤也

原藤蔓繁衍莖有倒刺逐節生葉大如掌狀類小葵葉面青背白厚而有毛六七月開小白花就蒂結實三四十顆成簇生則青黃熟則紫黯微有黑毛形如熟椹而扁冬月苗葉不凋者俗名割田蘽氣味酸平無毒安五臟益精氣令人有子益顏色長髮久服輕身不老 一種蔓小於蓬蘽一枝三葉葉面青背淡白而微有毛開小白花四月實熟其色紅如櫻桃者俗名蘽田蘽即爾雅所謂蘽者也故郭璞注云蘽即莓也子似覆盆而大赤色酢甜可食此種不入藥

### 懸鉤子



**增**爾雅前山莓註今之木莓也實似蔗莓而大亦可食

**本草綱目**懸鈎子一名沿鈎子一名山莓一名樹莓

陳藏器曰莖上有刺如懸鈎故名懸鈎樹生高四五尺其莖白色有倒

刺其葉有細齒青色無毛背後淡青頗似櫻桃葉而狹

長又似地棠花葉四月開小白花結實色紅今人亦通

呼為蔗子氣味酸平無毒醒酒止渴除痰去酒毒搗汁

服解射工沙虱毒

蛇莓

**增**本草綱目蛇莓一名蛇蔗一名地莓一名蠶莓汪機

地而生故曰地莓吳瑞曰蠶老時熟紅於地其中空者為蠶莓中實極紅者為蛇殘莓人不噉之恐有蛇殘也

就地引細蔓節節生根每枝三葉葉有齒刻四五月開

小黃花五出結實鮮紅狀似覆盆氣味甘酸大寒有毒

治胸腹大熱不止傷寒大熱及溪毒射工毒甚良通經

協瘡腫傳蛇傷湯火傷

使君子

**原**使君子一名留求子開寶本草云俗傳潘州郭使君

使君子本草綱目云按南方草木狀謂之留求子療嬰孺之疾則自魏晉已用但各異耳其莖作藤

生如手指大如葛繞樹而上葉青如五加葉五月開五

瓣花一簇一二十葩初淡紅久乃深紅色輕虛如海棠

作架植之蔓延若錦實長寸許五瓣合成有稜初時半

黃熟則紫黑其中仁白上有薄黑皮如榧子仁而嫩味

如栗七月采久者油黑不可用氣味甘溫無毒治小兒



五疳健脾胃除虛熱殺蟲療瀉痢小兒百病瘡癬皆治  
凡服使君子忌飲熱茶犯之即瀉

**集藻**七言絕句原宋無名氏使君子花竹籬茅舍趁溪  
斜白白紅紅牆外花浪得佳名使君子初無君子到君  
家

### 木鼈子

**增**本草綱目木鼈子一名木蟹馬志曰其核似鼈蟹狀故以為名蘇頌  
曰春生苗作藤生葉有五桠狀如山藥青色面光四月  
生黃花六月結實似栝樓而極大生青熟紅黃色肉上  
有軟刺每一實有核三四十枚其狀扁而如鼈八九月  
采之嶺南人取嫩實及苗葉作茹蒸食李時珍曰木鼈

核形扁礪砢大如圍碁子其仁青綠色氣味甘溫無毒  
治折傷消結腫惡瘡生肌止腰痛除粉刺黥黯婦人乳  
癰治疔積痞塊利大腸瀉痢痔瘡瘰癧

### 番木鼈

**增**本草綱目番木鼈一名馬錢子一名苦實把豆一名  
火失刻把都狀似馬之連錢故名馬錢蔓生夏開黃花七八月結實  
如栝樓生青熟赤亦如木鼈其核小於木鼈而色白彼  
人言治一百二十種病或云以豆腐制過用之良或云  
能毒狗至死氣味苦寒無毒治傷寒熱病咽喉痺痛消  
痞塊竝含之嚙汁或磨水嚙

### 馬兜鈴



**增**本草綱目馬兜鈴一名都淋藤一名獨行根一名土

青木香一名三百兩銀藥根名雲南根寇宗奭曰蔓生附木而上葉脫

時其實尚垂狀如馬項之鈴故得名也李時珍曰其根吐利人微有香氣故有獨行木香之名嶺南人用治蠱

隱其名為三蘇頌曰春生苗作蔓繞樹而生葉如山蕒百兩銀藥

葉而厚大背白六月開黃紫花頗類枸杞花七月結實

如大棗狀似鈴作四五瓣根微似木香大如小指赤黃

色氣味苦寒無毒治肺熱欬嗽痰結喘促血痔瘻瘡肺

氣上急解蛇蠱毒根氣味辛苦冷有毒治鬼疰積聚諸

毒熱腫取汁服吐蠱毒治五種蠱毒

預知子

**增**本草綱目預知子一名聖知子一名聖先子一名盍

合子一名仙沼子

馬志曰相傳取子二枚綴衣領上遇有蠱毒則聞其有聲當預知之故有

名諸蘇頌曰作蔓生依大木上葉綠有三角面深背淺七

月八月有實作房生青熟深紅色每房有子五七枚如

皂莢子斑褐色光潤如飛蛾其根治蠱功勝於子山民

目為聖無憂子仁氣味苦寒無毒治殺蟲療蠱治諸毒

疰瘕氣塊消宿食止煩悶利小便催生中惡失音髮落

天行溫疾塗一切蛇蟲蠶咬治一切病

牽牛

**原**牽牛

本草注云此藥始出田野人牽牛謝藥故以名焉

一名盆甌草

酉陽雜俎云盆

甌草即牽牛子也結實後斷之狀如盆甌其中有子似龜

一名黑丑白丑一名草金

鈴一名狗耳草

本草綱目云近人隱其名為黑丑白者為白丑蓋以丑屬牛也金鈴象子形狗

續

續

續



耳象處處有之有黑白二種黑者野生尤多二月種子  
三月生苗作藤蔓遶籬墻高者或二三丈蔓有白毛斷  
之有白汁其葉青有三尖如楓葉花不作瓣如旋花而  
大碧色其實有蒂裹之生青枯白核與棠棣子核相似  
但深黑耳白者蔓微紅無毛有柔刺斷之有濃汁葉團  
有斜尖並如山藥莖葉花淺碧蒂紅色核白色稍麤其  
嫩實蜜煎爲果名天茄氣味苦寒有毒治水氣在肺喘  
滿腫脹下焦鬱遏腰背脹腫大腸氣秘風秘卓有奇功  
但病在血分及脾胃虛弱而痞滿者則不可取快一時  
及常服致傷元氣

集藻

五言古詩增

宋梅堯臣牽牛

楚女霧露中籬上摘

牽牛花蔓相連延星宿光未收采之一何早日出顏色  
收持寘梅窓間染薑奉盤羞爛如珊瑚枝惱翁齒牙柔  
齒牙不能餐梁肉坐爲仇 牆東有冬瓜費盡滋漑力  
牽牛獨得志抽走無尋尺旣上我屋壁復冒我籬落遊  
藤僅細綉逐節分豆葉未欲揮鋤斤且與妝秋色任他  
繞屋去度表幽人宅 蘇軾賦園中所有牽牛非佳花  
走蔓入荒榛開花荒榛上不見細蔓身誰剪薄素紗浸  
之青藍盆水淺浸不盡下餘一寸銀嗟爾脆弱草豈能  
凌霜晨物性有稟受安問秋與春 元郝經甲子歲後  
園牽牛野花照天星星中花亦盛長夏蔓草深疎籬掩  
斜徑幽庭日無事森寂淡相映繚繞絲亂垂點綴葉相



並金風一披拂零露光彩競參差碧玉簪縮插滑欲迸  
霜絲吐冰同容色好娟淨堂陰青錦張牆背紫苔瑩時  
方鵲橋成佳節當秋孟織女能翦裁天河洗尤稱女以  
秋爲期郎將花作證風雨開雲屏鸞皇鏘月鏡處處乞  
巧筵家家喜相慶五年江館客萬事成墮甌不能致龍  
節空自悲虎穿永日鑿炎蒸中暑甘臥病對花淚盈目  
坐起不覺暝雲漢見雙星回頭看斗柄遙憐小兒女婚  
嫁俱未竟中流虞風波相見何日更  
明吳寬牽牛本  
草載藥品草部見牽牛薰風籬落間蔓生甚綢繆誰琢  
紫玉簪葉密花仍稠日高卽拏斂豈是朝菌儔陰氣得  
獨盛下劑斯見收便須作花庵誰與迂叟謀

五言律詩

增

宋邵雍花庵多牽牛清晨始開日出已瘁

花雖甚美而不能留賞望遠雲凝岫妝餘黛散鈿縹囊

承曉露翠葢拂秋烟嚮慕非葵比彫零在槿先才供少

頃玩空廢日高眠葉開深如幄花繁翠似鈿瀼瀼零

曉露冪冪蔽晴烟謝旣成番次開仍有後先主人凝佇

看長是廢朝眠趙蔗境牽牛西風樵子谷藤蔓絡柴

關名在星河上花開曉露間秋空同碧色曉日轉紅顏

若挂青松頂儻然不可攀蘇軾詩

五言絕句

增

宋文同牽牛花柔條長百尺秀萼包千葉

不惜作高架爲君相引接蘇軾詩

七言絕句

增

宋楊萬里牽牛花素羅笠頂碧羅簷曉卸



藍裳著茜衫望見竹籬心獨喜翻然飛上翠雲簷莫  
笑渠儂不服箱天孫爲織錦雲裳浪言偷得星橋巧只  
解冰盤染紫薑曉思歡欣晚思愁繞籬榮架大嬌柔  
木犀未發芙蓉老買斷西風恣意秋姜夔詠牽牛青  
花綠葉上疎籬別有長條竹尾垂老覺殘妝差有味滿  
身秋露立多時不見青青繞竹生西風籬落抱枯藤  
道人一任空花過愁殺山陰覓句僧楊巽齋牽牛青  
青柔蔓遶修篁刷翠成花著處芳應是折從河鼓手天  
孫斜插鬢雲香施東洲牽牛一泓天水染朱衣生怕  
紅埃透日飛急整離離蒼玉珮曉雲光裏渡河歸林  
逋出牽牛圓似流泉碧翦紗墻頭藤蔓自交加天孫滴

下相思淚長向秋深結此花

詩散句增宋蘇軾牽牛獨何畏詰曲自牙蘂走尋荆與

榛如有宿昔約秦觀籬落秋暑中碧花蔓牽牛趙

山臺秋來難得花成染閒引牽牛上短籬盧贊元紅

芭蕉映黑牽牛金高士談風動牽牛晚花碧

別錄原修治凡采得子曬乾水淘去浮者再曬拌酒蒸

從已至未曬乾收之臨用春去黑皮今多只碾取頭末  
去皮麩不用亦有半生半熟用者

栝樓

原栝樓一名果羸一名瓜萋一名天瓜一名黃瓜一名

地樓一名澤姑爾雅云果羸之實栝樓注云今齊人呼

黃羸芳譜牽牛栝樓



云木上曰果地下曰菰此物蔓生附木故得兼名栝樓  
卽果羸二字音轉也亦作菰藟後人又轉爲瓜萋古者  
瓜姑同音故所在有之三四月生苗引藤蔓葉如甜瓜  
有澤姑之名

葉而窄作叉有細毛七月開花似壺蘆花淺黃色結實  
在花下如拳生青至九月熟黃赤色形有圓者圓者色  
黃皮厚

蒂小爲雌  
陽人服有銳而長者長者皮赤蒂麤  
爲雄陰人服內有扁子大如

絲瓜子殼色褐子色綠多脂作青氣根一名白藥一名

瑞雪一名天花粉直下生年久者長數尺大二三圍秋

後掘者有粉夏月者有筋無粉不堪用氣味甘寒無毒

治胸痺潤肺燥治欬嗽滌痰結利咽喉止消渴利大腸

消癰腫瘡毒降上焦之火使痰氣下降不犯胃氣子性

同補虛勞潤心肺治吐血腸風下血赤白痢手面皴口

乾根甘酸微苦寒製爲粉潔白美好大宜虛熱人解煩

渴行津液除腸胃中瘕熱治熱狂時疾通小腸消腫毒

乳癰發背痔瘻瘡癰排膿生肌消撲損瘀血莖葉味酸

生津止渴潤枯降火

**彙考** **增** 雞肋編燕地女子冬月用苦萋塗面謂之佛妝

但皆傳而不洗至春暖方滌去久不爲風日所侵故潔

白如玉也

**別錄** **原** 修治 凡使皮子莖根其効各別古方全用後乃

分別各用用實者去殼皮革膜及油用根者澄粉 作

天花粉法 秋冬采根大二三圍者去皮寸切水浸逐日

換水五日後取出搗泥以絹衣濾過澄粉曬乾每服方



寸七水化下亦可入粥及乳酪中食善治消渴

### 王瓜

**原**王瓜一名土瓜一名野甜瓜一名馬炮瓜一名赤雹子一名老鴉瓜一名師姑草俚人名公公鬚一名鉤瓢

爾雅云鉤瓢姑註云鉤瓢也一名王瓜本草注云王瓜即今土瓜鄭玄注月令王瓜生以為菘葵殊謬圖經本草云月令王瓜生即此均房間人呼為老鴉瓜亦曰菘瓜按爾雅曰黃菘瓜郭璞注云似土瓜又曰芴菲亦謂之土瓜皆別是一物非此土瓜也本草綱目云土瓜其根作土氣其實似瓜也或云根味如瓜故名瓜似雹子熟則色赤鴉喜食之故俗名赤雹子老鴉瓜一葉之下一鬚故俚人呼為公公鬚王瓜不知何義按兼明書以枯樓為王瓜謂其大于土瓜故以王字別之誤也 四月生苗其蔓多鬚嫩時可茹葉圓如馬蹄而有尖面青背淡澀而不光五六月開小黃花成簇花下結子纍纍如彈丸其殼徑寸長二寸

許上微圓下尖長生青七八月熟赤紅色皮麤澀根如枯樓根之小者用須深掘二三尺乃得正根江西人栽以沃土取根作蔬食如山藥南北二種微有不同若療黃疸破血南者大勝根苦平無毒治天行熱疾酒黃心胸煩熱消瘀血破癥瘕治面黑面瘡落胎子酸苦平無毒生用潤心肺治黃病炒用治肺痿吐血腸風瀉血赤白痢反胃吐食蠱毒

### 黃環

**增**本草綱目黃環一名凌泉一名大就一名就葛一名

生芻一名根韭實名狼跋子一名度穀此物葉黃而圓故名黃環亦是葛類故巴西人謂之就葛跋子乃吳普曰二月生苗正赤狼足名其莢似之故曰狼跋子



高二尺葉黃圓端大葉有汁黃白五月實圓三月采根  
黃色從理如車輻解根氣味苦平有毒治蠱毒鬼疰鬼  
魅邪氣除欬逆寒熱上氣急百邪痰嗽消水腫子氣味  
苦寒有小毒治惡瘡蝸疥殺蟲魚塗瘡疥

天門冬

**原** 天門冬一名藁冬一名滿冬

爾雅云藁藁冬注一云門冬一名滿冬

名天棘一名顛棘一名地門冬一名筵門冬一名萬歲

藤抱朴子云在東岳名淫羊藿在西岳名管松在南岳名百部在北岳名無不愈在中岳名天門冬在京陸山阜名顛勒在越人名荒草名雖異其實一也本草綱目云草之茂者名藁此草茂而功同麥冬故名天門冬或云天棘爾雅云髦顛棘也因其細葉如髦有細棘也顛天音相近也按救荒本草云俗呼萬歲藤又名婆羅樹其形與治肺之功頗同百部故亦名百部藁處處有藜乃營實苗而爾雅指為門冬或古書錯簡也

之春生藤蔓大如釵股高至丈餘葉如茴香極尖細而  
疎滑莖間有逆刺亦有澀而無刺者其葉如絲杉而細  
散夏生細白花亦有黃色紫色者秋結黑子在其根枝  
旁入伏後無花暗結子其根一科數十枚大如手指圓  
實而長黃紫色肉白以大者為佳中心如麥冬心而  
稍麤性苦平無毒潤燥滋陰清金降火保肺氣通腎氣  
養肌膚止消渴治濕疥除身上一切惡氣不潔之疾久  
服令人肌體滑澤潔白李時珍云天門冬清金降火益  
水之上源故能下通腎氣入滋補方合羣藥用之有效  
若脾胃虛寒人單餌既久必病腸滑反成痼疾此物性  
寒而潤能利大腸故也服天門冬忌鯉魚誤食中毒者



搗萍汁服之可解

**彙考增**宋史地理志順慶府貢天門冬 普州貢天門

冬 **山海經**條谷之山其草多藁冬 鮮山其草多藁

冬 **列仙傳**赤松子服天門冬齒落更生細髮復出

**神仙傳**甘始者太原人也善行氣不飲食又服天門冬

在世百餘歲入王屋山仙去 **抱朴子**入山便可以天

門冬蒸煑啖之取足以斷穀若有力可餌之或作散酒

服或搗汁作液膏服至百日丁壯兼倍駛於木及黃精

也二百日強筋髓駐顏色與煉成松脂同蜜丸服尤善

杜紫微服之御八十妾有子百四十人日行三百里

**名山記**鬱山出天門冬 **建康記**建康出天門冬極精

妙 **彥周詩話**天棘蔓青絲洪覺範硬差天棘作顛柳

高秀實云天棘天門冬也當以秀實之言爲正顛天聲

相近又酷似青絲又江南徐鉉家本云天棘蔓青絲若

蔓生如青絲尤見是天門冬 **丹鉛錄**山海經小徑之

山有草名藹赤莖白華如顛冬也顛冬天門冬也

**集藻啟增**梁簡文帝謝勅賚益州天門冬啟逮自星橋

見珍玉壘本草稱其輕身延壽實爲上藥姬晉之重丹

桂曹丕之愛落英一蒙恩錫竊幸往代

**五言絕句增**宋朱子天門冬高蘿引蔓長插援垂碧絲

西窓夜來雨無人領幽姿

**別錄原**種植正二月取苗種肥地中每根相去二尺餘



不得稠不久其根甚茂若取根則留一分小者却栽時  
常上糞有草卽耘此物甚難種若都摘了恐不活種子  
卽成亦晚 **修治**二三七八月採根雖曝乾猶脂潤難  
搗必須去皮心用柳木甌及柳木柴蒸一伏時灑酒令  
遍更添火蒸作小架去地二三尺攤於上曝乾用 **服**  
食聖化經云以天門冬茯苓等分爲末日服方寸七則  
不畏寒大寒時單衣汗出也 **孫真人枕中記**云八九  
月採天門冬根曝乾爲末每服方寸七日三服久服補  
中益氣治虛勞絕傷年老衰損偏枯不隨風濕不仁冷  
痺惡瘡癰疽癩疾鼻柱敗爛者服之皮脫蟲出釀酒服  
去癥病積聚風痰顛狂三蟲伏尸除濕痺輕身益氣令

人不饑百日還童耐老釀酒初熟微酸久停則香美諸  
酒不及也 **臞仙神隱**云用乾天門冬十斤杏仁一斤  
搗末蜜漬每服寸七名仙人糧 **一法**天門冬二斤熟  
地黃一斤爲末煉蜜丸彈子大每服溫酒化三九日三  
服居山遠行辟穀良服至十日身輕目明二十日百病  
愈顏色如花三十日髮白更黑齒落重生五十日行及  
奔馬百日延年 **又法**天門冬搗汁微火煎取五斗入  
白蜜一斗胡麻炒末二升合煎至可丸卽止火下大豆  
黃末和作餅徑三寸厚半寸一服一餅一日三服百日  
以上有益 **又法**天門冬末一升松脂末一升蠟蜜一  
升和煎丸如梧子大每日早午晚各服三十丸 **天門**



冬酒補五臟調六腑令人無病天門冬三十斤去心搗碎以水二石煮汁一石糯米一斗細麴十斤如常炊釀酒熟日飲三杯 〔天門冬膏〕去積聚風痰補肺療欬嗽失血潤五臟殺三蟲伏尸除瘟疫輕身益氣令人不饑以天門冬流水泡過去皮心搗爛取汁砂鍋文武炭火煮勿令太沸以十斤爲率熬至三斤却入蜜四兩熬至滴水不散瓶盛埋土中一七去火毒每日早晚白湯調服一匙若勤大便以酒服之

百部

**原**百部 本草綱目云其根多者一名野天門冬一名婆 婦草山野處處有之春生苗作藤蔓葉大而尖長頗似

竹葉面青而光亦有細葉如荷香者莖青微嫩時亦可煮食莖多者五六十長尖內虛根數十相連似天門冬而苦根長者近尺黃白色鮮時亦肥實乾則虛瘦無脂潤性甘微溫無毒清肺熱潤肺治寒嗽上氣傳尸骨蒸勞瘵殺虻蟲寸白蟻蟲種法與百合同宜山地

**別錄原**修治 凡採得以竹刀劈去心皮花作數十條懸簷下風乾却用酒浸一宿漉出焙乾剉用或一窠八十三條者號曰地仙苗若修事餌之可千歲也 九真一種最長大懸火上令乾取四五寸切短夜含嚙汁勿令人知治暴嗽甚良

何首烏



**原**何首烏一名交藤一名交莖一名夜合一名地精一

名赤葛一名瘡帚一名紅內消一名九真藤一名桃柳

藤一名馬肝石一名陳知白一名野苗圖經本草云此

何首烏服而得者也唐元和七年僧文象遇茅山老人

遂傳此事日華本草云其藥本草無名因何首烏見藤

夜交便即採食有功因以採人為名耳李時珍日馬肝

石能治人髮后人隱此名亦日馬肝石赤者能消腫毒

外科呼為瘡帚紅內消斗門方云取根處處有之以西

若獲九數者服之乃仙故名九真藤

洛嵩山及栢城縣者為勝有形如鳥獸山川者尤佳春

生苗蔓延竹木墻壁間莖紫色葉葉相對如薯蕷而不

光澤夏秋開黃白花如葛勒花結子有稜似蕎麥而雜

小纔如粟秋冬取根大者如拳連珠有赤白二種赤者

雄苗色黃白白者雌苗色黃赤根遠不過三尺夜則苗

蔓相交或隱化不見性苦濇微溫無毒白者入氣分赤

者入血分腎主閉藏肝主疏洩此物氣溫味苦濇苦補

腎溫補肝能收斂精氣所以能養血益肝固精益腎健

筋骨烏髭鬚治五痔腰膝之病冷氣心痛積年勞瘦痰

癖風虛敗劣壯氣駐顏延年益壽功難盡述茯苓為使

忌諸血無鱗魚鐵器犯之令藥無功此藥不寒不燥功

在地黃天冬諸藥之上凡服藥用偶日二四六八日服

訖以衣覆汗出導引尤良

**彙考**

**增**

彙考增彥州詩話古詩云上山採交藤交藤何首烏也

服之令人多欲生子有采采芣苢之意

**原**

李遠附錄何首烏以出南河縣及嶺南恩州韶州潮州賀州廣州



潘州四會縣者爲上邕州桂州康州春州高州勒州循州晉興縣出者次之真仙草也五十年者如拳大號山奴服之一一年髮髭青黑一百年者如椀大號山哥服之一一年顏色紅悅一百五十年者如盆大號山伯服之一一年齒落更生二百年者如斗栲栳大號山翁服之一一年顏如童子行及奔馬三百年者如三斗栲栳大號山精純陽之體久服成地仙

本草綱目宋懷州知州李治與一武臣同官怪其年七十餘而輕健面如渥丹能飲食叩其術則服何首烏丸也乃傳其方後治得病盛暑中半體無汗已二年竊自憂之造丸服至年餘汗遂浹體

此藥流傳雖久服者尙寡嘉靖初邵應節真人以

七寶美髯丹方上進服餌有效連生皇嗣於是何首烏之方天下大行矣

**集藻**尺牘增宋蘇軾與歐陽知晦尺牘聞公服何首烏是否此藥溫厚無毒李習之傳正爾啖之無炮製今人用棗或黑豆之類蒸熟皆損其力僕亦服此但採得陰乾便杵羅爲末棗肉或煉蜜爲丸入水日中萬杵乃丸服極有力無毒恐未得此法故以奉白

**雜著**原唐李翱何首烏錄僧文象好養生術元和七年三月十八日朝茅山遇老人於華陽洞口告僧曰汝有仙相吾授汝秘方有何首烏者順州南河縣人祖能嗣本名田兒天生闔嗜酒年五十八因醉夜歸臥野中及



醒見田中有藤兩本相遠三尺苗蔓相交久乃解解合  
三四心異之遂掘根持問村野人無能名曝而乾之有  
鄉人袁良戲而曰汝闖也汝老無子此藤異而後以合  
其神藥汝盍餌之田兒乃篩末酒服經七宿忽思人道  
累旬力輕健慾不制遂娶寡婦曾氏田兒因常餌之七  
百餘日舊疾皆愈反有少容鄉人異之十年生數男俱  
號爲藥告田兒曰此交藤也服之可壽百六十歲古方  
草不載吾傳於師亦得之於南河吾服之遂有子吾本  
好靜以此藥害於靜因絕不服女偶餌之乃天幸因爲  
田兒盡記其功而改田兒名能嗣焉嗣年百六十歲乃  
卒男女一十九人子庭服亦年百六十歲男女三十人

子首烏服之年百三十歲男女二十一人老人言訖遂  
別去其行如疾風浙東知院殿中孟侍御識何首烏嘗  
餌其藥言其功如所傳南人因呼爲何首烏焉

**贊原**無名氏何首烏贊神効勝道著在仙書雌雄相交  
夜合晝疏服之去穀日居月諸返老還少變安病軀有  
緣者遇勗爾自如

**五言古詩****增**宋文同寄何首烏丸與友人此草有奇効  
嘗聞於習之陵陽亦舊產其地尤所宜翠蔓走巖壁芳  
叢蔚參差下有根如拳赤白相雄雌斷之高秋後氣味  
乃不虧斷以苦竹刀蒸曝凡丸爲夾羅下香屑石蜜相  
和治入曰杵萬過盈盤走纍纍日進豈厭屢初若無所



滋漸久覺膚革鮮潤如凝脂既已鬚髮換白者無一絲  
耳目固聰明步履欲走馳十年親友別忽見皆生疑問  
胡得爾術容貌曾莫衰爲之講靈苗不爲世俗知蓋以  
多見賤蓬藿同一虧君如聽予服此語不敢欺勿信柳  
子厚但誇仙靈毗

詩散句增宋梅堯臣試採上陽何首烏刮切仍致苦竹

刀

**別錄原**修治春夏秋采其根雌雄並用乘濕以布拭去  
土曝乾臨時以竹刀切米泔浸經宿曝乾木杵臼搗之  
忌鐵器 新採者去皮銅刀切薄片入甑內瓷鍋蒸之  
旋以熱水從上淋下勿令滿溢候無氣息取出曝乾用

近時治法用何首烏赤白各一斤竹刀刮去麤皮米  
泔浸一夜切片用黑豆三斗分九分每次用一分以水  
泡過砂鍋內鋪豆一層首烏一層重重鋪盡蒸之豆熟  
取出去豆將何首烏曬乾再以豆蒸如此九蒸九曬乃  
用

### 草薺

**增**本草綱目草薺一名赤節一名百枝一名竹木一名  
白菝葜蘇頌曰作蔓生苗葉俱青葉作三叉似山薯又  
有綠豆葉花有黃紅白數種亦有無花結白子者根黃  
白色多節三指許大春秋采根曝乾今成德軍所產者  
根亦如山薯而體硬其苗引蔓葉似蕎麥子三稜不拘



時月采根利刀切片曝乾用氣味苦平無毒治腰瘡痛  
強骨節風寒濕周痺惡瘡不瘳熱氣痢疾中風補水臟  
堅筋骨益精明目

### 菝葜

**增**本草綱目菝葜作菝一名金剛根一名鐵菱角一名

王瓜草菝葜猶菝葜也菝葜短也此草莖蔓強堅短小

菱角皆狀其堅而有尖也鄭樵通志云其葉頗近土瓜故名王瓜草山野中甚多其莖似

蔓而堅強直生有刺其葉團大狀如馬蹄光澤似柿葉

秋開黃花結紅子其根甚硬有硬鬚如刺其葉煎飲酸

澆野人采其根葉入染家用氣味甘酸平無毒治腰背

寒痛風痺益血氣治時疾瘟瘴消渴肝經風虛

**集藻**五言古詩**增**宋張耒菝葜江鄉有奇蔬本草寄菝

葜驅風利頑痺解疫補體節春深土膏肥紫筍迸土裂

烹之芼薑橘盡取無可掇應同玉井蓮已過苗頭苗異

時中州去買子攜根撥免令食蔬人區區美薇蕨

### 土茯苓

**增**本草綱目土茯苓一名土草薺一名刺猪苓一名山

猪糞一名草禹餘糧一名仙遺糧一名冷飯團一名硬

飯一名山地栗按陶弘景注禹餘糧云南中平澤有一

種藤根作塊有節似菝葜而色赤味如

薯蕷亦名禹餘糧即今土茯苓也故今尚有仙遺糧冷

飯團之名陳藏器本草草禹餘糧蘇頌圖經刺猪苓皆  
此物土茯苓刺猪苓山地栗蔓生如蓴莖有細點其葉  
皆象形也俗又名過岡龍

不對狀頗類大竹葉而質厚滑如瑞香葉而長五六寸



其根狀如菝葜而圓其大若雞鴨子連綴而生遠者離尺許近或數寸其內軟可生啖有赤白二種入藥用白者良氣味甘淡平無毒食之當穀不饑調中止洩健行不睡健脾胃強筋骨去風濕利關節止泄瀉治拘攣骨痛惡瘡癰腫解汞粉銀朱毒

### 白歛

**增**本草綱目白歛一名白草一名白根一名兔核一名

貓兒卵一名崑崙

寇宗奭曰歛瘡方多用之故名白歛李時珍曰兔核貓兒卵皆象形也崑

崙言其皮黑也

蘇頌曰二月生苗多在林中作蔓赤莖葉如小

桑五月開花七月結實根如雞鴨卵而長三五枚同一

窠皮黑肉白一種赤歛花實功用皆同但表裏俱赤氣

味苦平無毒治癰腫疽瘡散結氣止痛除熱目中赤小兒驚癇溫瘧殺火毒刀箭瘡撲損解狼毒毒

### 女萎

**增**唐本草女萎葉似白歛蔓生花白子細亦名蔓楚氣味辛溫無毒治風寒霍亂洩痢腸鳴遊氣上下無常驚癇寒熱百病出汗

### 赭魁

**增**本草綱目赭魁

其根如魁有汁如赭故名魁乃酒器名

韓保昇曰苗蔓

延生葉似蘿摩根若菝葜皮紫黑肉黃赤大者輪如升小者如拳李時珍曰按沈括筆談云今南中極多膚黑肌赤似何首烏切破中有赤理如檳榔有汁赤如赭彼



人以染皮製靴閩人謂之餘糧氣味甘平無毒治心腹積聚除三蟲

鵝抱

**增**圖經本草鵝抱生宜州山林下附石而生作蔓似大豆其根形似萊菔大者如三升器小者如拳氣味苦寒無毒治風熱上壅咽喉腫痛及解蠱箭藥毒亦消風熱結毒

伏雞子

**增**本草拾遺伏雞子根一名承露仙蔓延生葉圓薄似錢根似鳥形者良氣味苦寒無毒解百藥毒治諸熱煩悶急黃天行黃疸瘡瘡中惡寒熱頭痛疽瘡馬黃牛瘡

亦傳癰腫

附仰盆

**增**本草拾遺仰盆苗似承露仙根圓如仰盆狀大如雞卵味辛溫有小毒治蠱毒飛尸喉痺磨傅皮膚惡腫

附人肝藤

**增**本草拾遺人肝藤引蔓而生葉有三桠花紫色與伏雞子同名承露仙而伏雞子葉圓解諸藥毒遊風手脚軟痺

九仙子

**增**本草綱目九仙子一名仙女嬌一根連綴九枚大者如雞子小者如半夏白色二月生苗蔓高六七尺莖細



廣羣芳譜 藥譜六  
而光葉如烏柏葉而短扁不圓每葉極生子枝或一或  
二裊裊下垂六七月開碎青黃色花隨即結實碎子叢  
簇如穀精草子狀九月采根氣味苦涼無毒治咽痛喉  
痺散血

山豆根

**增**本草綱目山豆根一名解毒一名黃結一名中藥其蔓

如大豆因以爲名蘇頌曰苗蔓如豆葉青經冬不凋八月采根

廣南者如小槐高尺餘氣味甘寒無毒解諸藥毒止痛  
消瘡腫毒發熱欬嗽治人及馬急黃殺小蟲解咽喉腫  
毒治腹脹喘滿女人血氣腹脹又下寸白諸蟲止下痢  
卒患熱厥心腹痛五種痔痛研汁塗諸熱腫禿瘡蛇狗

蜘蛛傷

黃藥子

**增**本草綱目黃藥子一名木藥子一名大苦一名赤藥

一名紅藥子按沈括筆談云本草注引郭璞注爾雅云

色青黃莖赤有節節有枝相當此乃黃今處處人栽之

藥也其味極苦故曰大苦非甘草也其莖高二三尺柔而有節似藤葉大如拳長三寸許其  
根長者尺許大者圍二三寸外褐內黃亦有黃赤色者  
肉色頗似羊蹄根冬枯春生開碎花無實氣味苦平無  
毒治諸惡腫瘡癩喉痺蛇犬咬毒涼血降火消癭解毒

解毒子

**增**圖經本草解毒子一名地不容出戎州蔓生葉青如



杏葉而大厚硬凌冬不凋無花實根黃白色外皮微麤  
褐纍纍相連如藥實而圓大采無時又開州與元府出  
苦藥子大抵與黃藥相類春采根暴乾亦入馬藥用氣  
味苦大寒無毒解蠱毒止煩熱辟瘴癘利喉閉及痰毒  
治五臟邪氣清肺壓熱消痰降火利咽喉退日赤

附錄 奴會子

**增**海藥本草奴會子生西國諸戎大小如苦藥子味辛  
平無毒主小兒冷疳虛渴脫肛骨立瘦損

附錄 海藥實

**增**本草綱目海藥實一名連木蘇恭曰蕃名那疏樹生  
葉似杏花紅白色子肉味酸李時珍曰此藥子似黃藥

苦藥子而稍有不同二藥子不結子此則樹之子也去  
皮取中仁用味辛溫無毒治邪氣諸痺疼酸續純傷補  
骨髓破血止痢消腫除蠱疰蛇毒

白藥子

**增**本草綱目蘇恭曰白藥子三月生苗葉似苦苣四月  
抽赤莖長似壺盧蔓六月開白花八月結子亦名瓜蔓  
九月葉落枝折根皮黃色氣味辛溫無毒治金瘡生肌  
消腫毒喉痺消痰止嗽治渴并吐血喉痺咽痛解野葛  
生金巴豆藥毒傅刀斧折傷能止血痛散血降火消痰  
解毒

附錄 陳家白藥



**增**嶺表錄陳家白藥善解毒封州康州有種之者廣府每歲克土貢 〔本草綱目〕陳家白藥出蒼梧陳家蔓及根並似土瓜葉如錢根似防已緊小者良味苦寒無毒主解諸藥毒亦去心胸煩熱天行瘟瘴

附錄甘家白藥

**增**本草拾遺甘家白藥出冀州以南生陰處葉似車前根如半夏其汁飲之如蜜味苦大寒有小毒解諸藥毒與陳家白藥功相似

附錄會州白藥

**增**本草拾遺會州白藥葉如白斂傅金瘡生膚止血 附錄衝洞根

**增**海藥本草衝洞根苗蔓如土瓜根亦相似 〔本草拾遺〕衝洞根味苦平無毒主熱毒蛇犬蟲癰瘡等毒

附錄突厥白

**增**開寶本草突厥白根黃白色狀似茯苓而虛軟苗高三四尺春夏葉如薄荷花似牽牛而紫上有白凌二八月采根味苦治金瘡生血止血補腰續筋

威靈仙

**增**本草綱目威靈仙 威言其性猛也靈言其功神也蘇頌曰陝西及

河東河北汴東江湖州郡皆有之初生作蔓莖如釵股七月內生花六出淺紫或碧白色作穗似蒲葦子亦有似菊花頭者實青色根稠密多鬚似穀李時珍曰其根



每年旁引年深轉茂一根叢鬚數百條長者二尺許初時黃黑色乾則深黑俗稱鐵脚威靈仙別有數種根鬚皆一樣色或黃或白皆不可用氣味苦溫無毒治諸風宣通五臟去腹內冷滯心膈痰水久積痕癥疔瘕氣塊腰膝疼療折傷散風邪久服無有溫瘧疾

**彙考增**圖經本草唐貞元中周君巢作威靈仙傳云商州有人病手足不遂不履地者數十年良醫殫技莫能療所親置之道旁以求救者遇一新羅僧見之告曰此疾一藥可活但不知此土有否因爲之入山求索果得乃威靈也使服之數日能步履山人鄧思齊知之遂傳其事

**別錄增**志林服威靈仙有二法其一淨洗陰乾搗羅爲末酒浸牛膝末或蜜丸或爲散酒調牛膝之多少視臟腑之虛實而增減之此詹山一親知患脚氣至重依此服半年遂永除其一法取此藥麤細得中者寸截之七十寸作一貼每歲作三百六十貼置牀頭五更初面東細嚼一貼候津液滿口嚥下此牢山一僧年百餘歲上下山如飛云得此藥方二法皆以得真爲要真者有五驗一味極苦二色深翠三折之脆而不勒四折之有微塵如胡黃連狀五斷處有白暈謂之鴈鴒眼無此五驗則藁本根之細者耳又須忌茶以槐角皂角牙之嫩者依造草茶法作或只取外臺秘要代茶飲子方常合服



乃可

剪草

**增**本草綱目陳藏器曰剪草生山澤間葉如茗而細李時珍曰狀如茜草又如細辛氣味苦涼無毒治諸惡瘡疥癬風瘙癢蝕有蟲一切失血

防已

**增**本草綱目防已一名解離一名石解李杲云防已如樂禍能首為亂階若善用之亦可禦敵其名或取此義解離因其紋解也蘇頌曰漢中出者破之文作車輻解黃實而香莖梗甚嫩苗葉小類牽牛折其莖一頭吹之氣從中貫如木通然他處者青白虛軟又有腥氣皮皺上有丁足子名木防已氣味辛平無

毒治風寒溫瘧熱氣諸癰除邪療水腫風腫去膀胱熱傷寒熱邪氣中風手脚攣急通腠理利九竅止洩散癰腫惡結諸痼疥癬蟲瘡散留痰肺氣喘嗽木防已治男子肢節中風毒風不語散結氣擁腫溫瘧風水腫去膀胱熱

木通

**增**本草綱目通草一名木通其莖中通故名通草即今所謂木通今之通草乃通

脫木也一名附支一名丁翁一名萬年藤子名燕覆蘇恭曰南

人謂為燕覆子或名鳥覆子陳藏器云陶弘景曰遠樹江東人呼為畜蒿子江西人呼為拏子

藤生汁白莖有細孔兩頭皆通合一頭吹之則氣出彼頭者良蘇頌曰蔓大如指其莖幹大者徑三寸一枝五



廣羣芳譜 藥譜六  
葉頗類石韋又似芍藥二葉相對夏秋開紫花亦有白花者結實如小木瓜食之甘美卽陳士良本草所謂桴棧子也李時珍曰有紫白二色紫者皮厚味辛白者皮薄味淡治除脾胃寒熱通利九竅血脉關節令人不忘去惡蟲療脾疸噦噫散癰腫諸結不消及金瘡惡瘡鼠瘻踈折鼈鼻息肉利諸經脉寒熱不通之氣理風熱安心除煩止渴退熱明目下水排膿止痛催生下胞治天行時疾頭痛目眩羸劣乳結喉痺咽痛導小腸火

通脫木

**增**爾雅離南活蒼注草生江南高丈許大葉莖中有瓢正白零陵人祖日貫之爲樹 本草綱目通脫木一名

通草

蘇頌曰爾雅活蒼卽通脫也山海經名寇脫又名倚商李杲曰能通竅利水固有通草之名與木通同功陳嘉謨曰白瓢中藏脫木得之故名通脫陳藏器曰生山側葉似蓖麻其莖空心中有白瓢輕白可愛女人取以飾物俗名通草

蘇頌曰今園圃有種蒔者或作蜜煎克果食之甘美氣味甘淡寒無毒利陰竅治五淋除水腫癰閉瀉肺解諸毒蟲痛明目退熱下乳催生花上粉治諸蟲癩惡瘡痔疾瘰癧及胸中伏氣攻胃咽

**彙考**

**增**山海經升山其草多寇脫注寇脫草生南方高

丈許似荷葉而莖中有瓢正白零桂人植而日灌之以爲樹也 熊山下其草多寇脫

附天壽根

錄

通脫木 天壽根

三



增圖經本草天壽根出台州每歲土貢其性凉治胸膈煩熱

金銀藤

原金銀藤一名忍冬一名通靈草一名鴛鴦藤一名左

纏藤一名蜜桶藤一名鷺鷥藤一名老翁鬚一名金釵

股本草注云凌冬不凋故名忍冬綱目云其花長瓣垂

功也土宿真君云蜜桶藤取汁能伏硫制汞故有通靈之稱處處有之附樹延蔓莖

微紫色有薄皮膜之其嫩莖色青有毛對節生葉葉如

薜荔而青有濇毛三四月後開花不絕花長寸許一帶

兩花二瓣一大一小長蕊初開者蕊瓣俱白經三二日

則變黃新舊相參黃白相映故呼金銀花氣甚清芬四

月采花藤葉不拘時采俱陰乾氣味甘寒無毒功用皆同治風除脹解痢逐尸消腫散毒療癰疽疥癬發背楊梅諸惡瘡皆為要藥

集藻五言古詩增金段克已同封仲堅采鷺鷥藤因而

成詠寄家弟誠之有藤名鷺鷥天生匪人育金花間銀

蕊翠蔓自成簇褰裳涉春溪采之漸盈掬藥物時所需

非為事口腹牛溲與馬渤良醫猶並蓄况此香色奇兩

通鼻與目尤喜療瘡瘍先賢講之熟世俗不知愛棄置

在空谷作詩與題評使異凡草木段成已和鷺鷥藤

詩并序吾兄同仲堅采鷺鷥藤於午芹之東溪因詠詩

見示前代詩人未嘗聞賦此者此花長於田野籬落間



人視之與草芥無異是詩一出好事者將知所貴矣感歎之餘敬次其韻有與我同志繼而述之不亦懿乎微雨灑郊坰百卉欣並育幽花發溪側間錯金珠簇徐看是鷲藤香味濃可掬忍饑出新句大笑負此腹遺落榛莽間采擷誰見蓄情知無俗姿安能悅衆目先生日來往東溪路應熟一經品題餘名字耀巖谷遇合良有時不才異山木

### 鈎藤

**增**本草綱目鈎藤

陶弘景曰出建平亦作弔藤李時珍曰其刺曲如鈎故名今人呼爲鈎

藤寇宗奭曰藤長八九尺或一二丈大如莓指其中空李時珍曰狀如葡萄藤而有鈎紫色古方多用皮後世

多用鈎氣味甘微寒無毒治小兒寒熱十二驚癇小兒驚啼癰癤熱擁客忤胎風大人頭旋目眩平肝風除心熱小兒內鈎腹痛發斑疹

### 附倒掛藤

**增**本草拾遺倒掛藤生深山有逆刺如懸鈎倒掛於樹葉尖而長味苦無毒主一切老血及產後諸疾結痛血上欲死煮汁服之

### 白兔藿

**增**本草綱目白兔藿蘇恭曰山南人謂之白葛苗似蘿摩圓厚莖有白毛與衆草異韓保昇曰蔓生葉圓似萼五月六月采苗氣味苦平無毒治蛇虺蜂蠱獬狗菜肉



廣羣芳譜 藥譜 白英  
蠱毒鬼疰風疰諸大毒

白英

**增**本草綱目白英一名穀菜一名白幕一名排風子名

鬼目白英謂其花色穀菜象其葉文排風言其功用鬼目象其子形蘇恭曰蔓生葉似

王瓜小長而五極實圓似龍葵子生青熟紫黑東人謂

之白草李時珍曰正月生苗白色可食秋開小白花根

苗氣味甘寒無毒治寒熱入疸消渴補中益氣久服輕

身延年葉作羹飲甚療勞煩熱風癩丹毒瘡瘧寒熱小

兒結熱子酸平無毒主明目

芄蘭

**增**爾雅藿芄蘭注藿芄蔓生斷之有白汁可啖 **陸璣**

詩疏芄蘭一名蘿摩幽州人謂之雀瓢

本草綱目蘿

摩一名白環藤實名雀瓢一名斫合子一名羊婆奶一

名婆婆鍼線包陳藏器曰漢高帝用子博軍士金瘡故

其實嫩時有漿裂時如瓢故有雀瓢羊婆奶之稱其中

一子有一條白絨長二寸許故俗呼婆婆鍼線包又名

袋兒也陶弘景曰蘿摩作藤生摘之有白乳汁人家多

種之葉厚而大可生啖亦蒸食之李時珍曰三月生

苗蔓延籬垣極易繁衍其根白軟其葉長而後大前尖

根與莖葉斷之皆有白乳如構汁六七月開小長花如

鈴狀紫白色結實長二三寸大如馬兜鈴一頭尖其殼

青軟中有白絨及漿霜後枯裂則子飛其子輕薄亦如

兜鈴子氣味甘辛溫無毒治虛勞補益精氣強陰葉煮



食功同子擣子傅金瘡生膚止血搗葉傅腫毒取汁傅丹毒赤腫及蛇蟲毒

**彙考**增詩衛風芄蘭之支

赤地利

**增**本草綱目赤地利一名赤薜荔一名五毒草一名五蕞一名蛇苒一名山蕎麥蘇頌曰春夏生苗作蔓繞草水上莖赤葉青似蕎麥葉七月開白花亦如蕎麥結子青色根若菝葜皮紫赤肉黃赤八月采根曬乾收氣味苦平無毒治赤白冷熱諸痢斷血破血生肌肉主癰疽惡瘡毒腫赤白遊癩醋磨傅蟲蠶蛇犬咬亦擣莖葉傅之恐毒入腹煮汁飲

紫葛

**增**唐本草紫葛生山谷中苗似葡萄長丈許根紫色大者徑二三寸氣味甘苦寒無毒主傅癰腫惡瘡

烏蘇莓

**增**爾雅拔龍葛注似葛蔓生有節江東呼為龍尾亦謂之虎葛細葉赤莖 **本草綱目**烏蘇莓一名五葉莓一

名龍草一名赤葛一名五爪龍一名赤潑藤 即爾雅拔

葉如白蘇故曰烏蘇俗名五爪龍曰龍尾曰蘇恭曰蔓

虎葛並取蔓形赤潑與赤葛及拔音相近生平澤葉似白蘇韓保昇曰莖端五葉開花青白色李時珍曰其藤柔而有稜一枝一鬚凡五葉葉長而光有疎齒面青背淡七八月結苞成簇青白色花大如粟黃



色四出結實大如龍葵子生青熟紫內有細子其根白色大者如指長一二尺擣之多涎滑氣味酸苦寒無毒傳癰癤瘡腫蟲咬風毒熱腫遊丹涼血解毒利小便消癰腫

葎草

**增**本草綱目葎草一名勒草一名葛勒蔓一名來苒草

此草莖有細刺善勒人膚故名勒草二月生苗莖有細訛為葎草又訛為來苒皆方音也

刺葉對節生一葉五尖微似蓖麻而有細齒八九月開細紫花成簇結子狀如黃麻子氣味甘苦寒無毒治瘀血止精益盛氣療五淋利小便止水痢除瘧虛熱渴治傷寒汗後虛熱疥癩潤三焦消五穀益五臟除九蟲辟

溫疫傳蛇蠍傷

澤瀉

**增**爾雅瀦葛注今澤瀉疏即藥草澤瀉也本草一名水

瀉一名及瀉一名芒芋一名鵠瀉本草綱目澤瀉一

名禹孫去水曰瀉如澤水之瀉也禹能治水故名禹孫蘇頌曰山東河陝江淮

皆有之漢中者為佳春生苗多在淺水中葉似牛舌獨莖而長秋時開白花作叢似穀精草秋末采根曝乾氣味甘寒無毒治風寒濕痺乳難養五臟益氣力肥健消水治痞滿五淋消腫脹滲洩止渴滲濕熱行痰飯止嘔吐瀉痢

羊蹄



增陸璣詩疏遂牛薺揚州謂之羊蹄似蘆菔而莖赤可  
瀹為茹滑而美也多啖令人下氣幽州人謂之遂  
草綱目羊蹄一名蓄一名秃菜一名敗毒菜一名牛舌  
菜一名羊蹄大黃一名鬼目一名東方宿一名連蟲陸  
一名水黃芹子名金蕎麥陶弘景曰今人呼為秃菜即蓄字音訛也李時珍曰羊蹄以根各牛舌以葉形各秃菜以治秃瘡名也金蕎麥以相似各也近水及濕地極多葉  
長尺餘似牛舌之形不似波稜入夏起臺開花結子花  
葉一色夏至即枯秋深即生凌冬不死根長近尺赤黃  
色如大黃胡蘿蔔形氣味苦寒無毒治頭秃疥癩浸淫  
疽痔腫毒殺蟲療蠱毒治癰殺一切蟲治產後風祕葉  
甘滑寒無毒治小兒疳蟲腸痔瀉血殺河豚魚毒作菜

多食滑大腑

酸模

增爾雅須蓀蕪注蓀蕪似羊蹄葉細酢可食 本草綱

目酸模一名山羊蹄一名山大黃一名酸母一名蓀一

名當藥即爾雅蓀蕪也蓀蕪乃酸模之音轉酸模又酸母之轉皆以味而名與三葉酸母草同名掌禹

錫以蓀蕪為蔓菁菜誤矣大明曰狀似羊蹄葉而小黃莖葉俱細節

間生子若芫蔚李時珍曰根葉花形並同羊蹄但葉小

味酸為異其根赤黃色連根葉取汁煉霜可制雄汞氣

味酸寒無毒治暴熱腹脹殺皮膚小蟲治疥療痢去汗

斑

龍舌草

續本草 酸模 龍舌草



**增**本草綱目龍舌葉如大葉菘菜及茅苡狀根生水底抽莖出水開白花根似胡蘿蔔根而香杵汁能軟鵝鴨卵方家用煮丹砂煨白礬制三黃氣味甘鹹寒無毒搗塗癰疽湯火灼傷

附麯舌錄

**增**名醫別錄麯舌生小水中五月采之味辛微溫無毒治霍亂腹痛吐逆心煩

苦草

**增**本草綱目苦草生湖澤中長二三尺狀如茅蒲之類治婦人白帶及好嗜乾茶不已面黃無力

石斛

**增**本草綱目石斛一名石遂一名金釵一名禁生一名

林蘭一名杜蘭石斛石遂未詳其莖狀如金釵之股故古有金釵石斛之稱今蜀人栽之呼為

金釵花林蘭杜蘭與木部木蘭同名恐誤蘇恭曰有二種一種似大麥累累

相連頭生一葉而性冷名麥斛一種莖大如雀髀葉在

莖頭名雀髀斛其他斛如竹而節間生葉也蘇頌曰多

在山谷中五月生苗莖似小竹節節間出碎葉七月開

花十月結實其根細長黃色惟生石上者為勝李時珍

曰石斛叢生石上其根糾結甚繁乾則白軟其莖葉生

皆青色乾則黃色開紅花節上自生根鬚人亦折下以

砂石栽之或以物盛挂屋下頻澆以水經年不死俗稱

為千年潤石斛短而中實木斛長而中虛處處有之以



蜀中者為勝氣味甘平無毒治傷中除痺下氣補五臟  
虛勞羸瘦久服厚腸胃補內絕不足平胃氣長肌肉逐  
皮膚邪熱痹氣脚膝疼冷痺弱定志除驚輕身延年益  
智清氣

### 骨碎補

**增**本草綱目骨碎補一名猴薑一名胡孫薑一名石毛

薑一名石菴藟

陳藏器曰骨碎補本名猴薑開元皇帝以其主傷折補骨碎故名或作骨

碎布訛矣江西人呼為胡孫薑象形也李時珍曰菴藟主折傷破血此物功同故有菴藟之名蘇頌曰

淮浙陝西夔路州郡皆有之生木或石上多在背陰處  
引根成條上有黃赤毛及短葉附之抽大葉成枝葉面  
青綠有青黃點背青白色有赤紫點春生葉至冬乾黃

無花實采根入藥李時珍曰其根扁長畧似薑形其葉  
有極缺頗似貫眾葉氣味苦溫無毒破血止血補傷折  
骨中毒氣風血疼痛五勞惡疾蝕爛肉殺蟲

### 石韋

**增**本草綱目石韋一名石韠一名石皮一名石蘭

陶弘景曰

蔓延石上生葉如皮故名石韋李時珍曰柔皮曰韋韠亦皮也蘇恭曰此物叢生石旁

陰處其生古瓦屋上者名瓦韋蘇頌曰今晉絳滌海福  
州江寧皆有之叢生石上葉如柳背有毛而斑點如皮  
福州別有一種石皮三月有毛采作浴湯治風李時珍  
曰多生陰崖險罅處其葉長者近尺濶寸餘柔韌如皮  
背有黃毛凌冬不凋又一種如杏葉者亦生石上其性



相同氣味辛平無毒治勞熱邪氣五癰閉不通利小便  
水道止煩下氣通膀胱滿補五勞安五臟去惡風益精  
氣治淋瀝發背主崩漏金瘡清肺氣

石莧

**增**圖經本草石莧生筠州多附河岸沙石上春生苗莖  
青高一尺以來葉如水柳而短八九月土人采之氣味  
辛苦有小毒同甘草煎服主齁齕又吐風涎

附石垂

**增**圖經本草石垂生福州山中三月花四月采子生擣  
為末丸服治蠱毒

景天

**原**

一名慎火本草注云裁之可救火故曰慎火一名戒火一名護火一

名辟火一名救火一名火母人多種於石山上二月生  
苗脆莖微帶赤黃色高一二尺折之有汁葉淡綠色光  
澤柔厚狀似長匙頭及胡豆葉而不尖夏開小白花結  
實如連翹而小中有黑子如粟粒其葉味苦平無毒治  
大熱火瘡諸蠱寒熱療金瘡止血除熱狂赤眼頭痛寒  
熱游風可煨硃砂苗葉花並可用葉煮熟水淘可食南  
北皆有人家多種於中庭或盆栽置屋上以防火極易  
生折枝置土中澆灌旬日便活

**彙考**

**增**南越志廣州有樹可以禦火山北謂之慎火或

謂之戒火多種屋上以防火也南中無霜雪故成樹



倦遊錄慎火卽龍骨樹也

**集藻**五言古詩增梁范筠詠慎火草茲卉信叢叢微榮未足奇何期糝香草遂得遶花池忘憂雖無用止談或有施早得建章立幸蕪栢梁垂

五言絕句增宋王十朋慎火草禁殿安蚩尾騷人逐畢方何如栽此草有火自能妨

石胡荽

**增**本草綱目石胡荽一名天胡荽一名野園荽一名鵝不食草一名雞腸草生石縫及陰濕處小草也高二三寸冬月生苗細莖小葉形狀宛如嫩胡荽其氣辛薰不堪食鵝亦不食之夏開細花黃色結細子極易繁衍僻

地則鋪滿也氣味辛寒無毒通鼻氣利九竅吐風痰去目醫療痔病解毒明目治耳聾頭痛腦酸痰瘧齟齬鼻窒不通散瘡腫

螺曆草

**增**本草拾遺螺曆草一名鏡面草蔓生石上葉狀似螺曆微帶赤色而光如鏡背有少毛小草也味辛治癰腫風疹脚氣腫

酢漿草

**增**本草綱目酢漿草一名酸漿一名三葉酸一名三角酸一名酸母一名醋母一名酸箕一名鳩酸一名雀兒酸一名雀林草一名小酸茅一名赤孫施此小草三葉酸也其味如



醋與燈籠草之酸漿各同物異李時珍曰苗高一二寸

鄭樵通志言福人謂之孫施

叢生布地極易繁衍一枝三葉一葉兩片至晚自合帖

整整如一四月開小黃花結小角長一二分內有細子

冬亦不凋方士采制砂汞礪砒石氣味酸寒無毒殺

附錄

諸小蟲治惡瘡癩瘦諸淋赤白帶塗湯火蛇蝎傷

**增**名醫別錄酸草生名山醴泉上陰厓莖有五葉青澤

附錄

根赤黃可以消玉一名醜草主輕身延年

**增**名醫別錄三葉生田中莖小黑白高三尺根黑三月

蜂螫人

地錦

**增**本草綱目地錦一名地肤一名地噤一名夜光一名

承夜一名草血竭一名血見愁一名血風草一名馬螳

草一名雀兒臥單一名醬瓣草一名獼猴頭草

赤莖布地故日地錦專治血病故俗稱為血竭血見愁馬螳雀兒喜掌

聚之故有馬螳雀兒單之名醬瓣獼猴頭象花葉形也禹錫曰莖葉細弱蔓延於地莖赤葉青紫色夏中茂盛

六月開紅花結細實取苗子用之李時珍曰田野寺院

及階砌間皆有之就地而生赤莖黃花黑實狀如蒺藜

之朶斷莖有汁方士秋月采煮雌雄丹砂硫黃氣味辛

平無毒通流血脉治癰腫惡瘡金刃撲損出血血痢下



血崩中能散血止血

附錄金瘡小草

**增**本草拾遺金瘡小草生江南村落田野間下濕地高一二寸許如薺而葉短春夏間有淺紫花長一粳米許味甘平無毒主金瘡止血長肌斷鼻中衄血血瘀及卒下血

崖櫻

**增**圖經本草崖櫻生施州石崖上苗高一尺以來其狀如櫻四季有葉無花土人采根去麤皮入藥氣味甘辛溫無毒治婦人血氣並五勞七傷同雞翁藤半天回野蘭根洗焙為末溫酒服

附錄雞翁藤

**增**圖經本草雞翁藤生施州蔓延大木上有葉無花味辛性溫無毒采無時

附錄半天回

**增**圖經本草半天回生施州春生苗高二尺以來赤斑色至冬苗枯土人夏月采根味苦澁性溫無毒

附錄野蘭根

**增**圖經本草野蘭根生施州叢生高二尺以來四時有葉無花其根味微苦性溫無毒采無時

紫背金盤

**增**本草綱目蘇頌曰紫背金盤生施州苗高一尺以來



葉背紫無花土人采根用李時珍曰湖湘水石處皆有  
之名金盤藤似醋筒草而葉小背微紫軟莖引蔓似黃  
絲槎之即斷無汁可見方士用以制汞他處少有氣味  
辛澹熱無毒治婦人血氣痛孕婦勿服能消胎氣

附醋筒草  
錄

**增**本草綱目醋筒草葉似木芙蓉而偏莖空而脆味酸  
開白花廣人以鹽醋淹食之

白龍鬚

**增**本草綱目白龍鬚生近水旁有石處寄生搜風樹節  
乃樹之餘精也細如櫻絲直起無枝葉最難得真者一  
種萬纏草生於白線樹根細絲相類但有枝莖稍麤為

異氣味平無毒治男子婦人風濕腰腿疼痛左癱右瘓  
口目喎斜及產後氣血流散惟虛勞癱痿不可服

馬勃

**增**本草綱目馬勃一名馬疔一名馬竄一名灰菰一名  
牛屎菰陶弘景曰紫色虛軟狀如狗肝彈之粉出寇宗  
奭曰生濕地及腐木上夏秋采之有大如斗者小亦如  
升杓氣味辛平無毒治惡瘡馬疥傳諸瘡治喉痺咽疼  
清肺散血熱解毒



佩文齋廣羣芳譜卷第九十八



